

1 Corintios

1-2 Høøch Pablo hädaa nocy cham njahby. Dióshøch xwyiinguejx coöchä Jesucristo xquiuguexyhädät. Mijts hädaa nocy cham nyajnäjahby, pønjaty ja'a Diosmädia'agy mäbøjp maa ja'a cajpt jaduñ xiøhatiän Corinto. Dios ja'a Jesucristo jaduñ quejx coo hajxy hoy xñähho'túutäm, pønjaty ja'a Jesucristo miädia'agy mäbøjcäp wiinduhmyhagajpt. Jaaya'ay hajxy nWiindsønhájtäm. Dios hajxy xyajnähdíjjäm coo ja'a Jesucristo hajxy xñähho'túutämät. Ja'a hermano Sóstenes, xyajpoo'xp mijts je'ebä. ³ Weenä Dios hoyhajt weenhajt hajxy xmio'oy møødä Jesucristo. Ja'a Dios hajxy nDeedyhájtäm.

⁴ Homiänájøch ja'a Dios nnäma'ay Dioscujú'uyäp je'eguiøxpä coo Dios mayhajt tiuñ maa mijtscøxpän. Paadiä Dios mayhajt jaduñ tiuñ, coo Jesucristo hajxy tu'ugmädia'agy mmøødhity. ⁵ Coo hajxy jaduñ mmøødhity, paadiä Dios hajxy tøø xpiuhbety møj may, jaduñ hajxy hoy mgápxät, jaduñ hajxy hoy mwiinjuø'øwät cøxiä. ⁶ Coo højts mijts ja'a mädia'agy tøø nyajwiingapxø'øy coo Jesucristo hajxy xñähho'túutäm, paadiä Diosmädia'agy hajxy hamuumdu'joot mmäbøjnä. ⁷ Coo hajxy jaduñ mmäbøjnä hamuumdu'joot, paadiä Dios mäjaa hajxy xjiaanç tehñ mio'oy coo hajxy mgudiuñ waambaty hajxy xyhane'emy. Mjøbhixyp mhajuøøbiä Jesucristo hajxy jaduñ coo quiädaactägatsa'añ. ⁸ Dios hajxy xpiuhbedaamb

coo miädia'agy hajxy hoy mgudiúunät. Paady mijts Dios hánajty xpiäda'aga'añ hawa'adstuum coo ja'a Jesucristo ja'a haxøøgjäya'ay hánajty yajcumädowaannä. ⁹ Tøyhajt ja'a Dios miädia'agy jaduñ. Cabä Dios mänaa yhøhnda'agy. Jaaya'ay hajxy tøø xyajnähdijy coo yHuung hajxy mmøødhjät tu'ugmädia'agy. Ja'a Jesucristo je'e.

¹⁰ Hermanodøjc, ja'a Jesucristo miädiá'agyhøch mijts cham nyajmøødcapx nyajmøødmädiaactägsaamby coo hajxy tu'ugjoot tu'ugwiinmahñdy mhídät maa tsajtøjcän. Cab hajxy tii myajtsibø'øwät. ¹¹ Páadyhøch jaduñ nmäna'añ, tøøchä hermanohajxy xyajmädoxyhaty coog hajxy mnimiädsibø'øyii. Jim hajxy choon maa Cloé tiøjcän. ¹² Wiingátiägä mädia'agy hajxy mbanøcxy. Näje'e hajxy miäna'añ cóogøch høøch nmädia'agy hajxy xpianøcxä. Näje'e hajxy miänaambä coogä Apolos miädia'agy hajxy pianøcxä. Näje'e hajxy miänaambä coogä Pedro miädia'agy hajxy pianøcxä. Y näje'e hajxy miänáangombä coogä Jesucristo miädia'agy hajxy pianøcxä. ¹³ Pero cabä Jesucristo miädia'agy hajxy madiu'u xyajnähixøøyyäm. Hix, jaaya'ay mijts jaduñ xñäho'tuut cruzcøxp, ca'a yhøøch mijts nnäho'tuut. Paady hajxy mnäbejty coo Jesucristo miädia'agy hajxy mbanøcxä, ca'a jie'eguiøxpä cooch høøch nmädia'agy hajxy xpianøcxä. ¹⁴⁻¹⁵ Jagóoyyøch ja'a craa Crispo nyajnäbejty maa mijtsän møødä craa Gayo. Cábøchä wiinghäna'c jim nnä'ä yajnäbejty. Cab hajxy jaduñ mmäná'anät cooc xtyijy nyajnäbejty. Páadyhøchä Dios jaduñ nnäma'ay Dioscujú'uyäp.

16 (Jexioo, chamčh njahmiejtstáacombä coočhä Estéfanashajxy nyajnábejpä, møødä yhuung møødä tio'oxy. Cab ndiijy wiinghäna'c njaac yajnábejty.)

17 Ca'a jäya'ay-yajnábéjpech Jesucristo xquiejxy. Diosmädia'agy-yajwá'xpøch xquiejxy coo hajxy xñähho'túutäm cruzcøxp. Coočh jaduhñ nwädity Diosmädia'agy-yajwa'xpä, howyiinjuøøñoch hánajty ngapxy nmädia'agy. Páadyhøch jaduhñ ngapxy nmädia'agy howyiinjuøøñä, chójpiøch njoot jaduhñ coo hajxy hoy mwiinjuó'øwät ja'a Jesucristocøxpä. Cábøch njoot chocy coočh nmädia'agy hajxy xquiumáayyät je'eguiøxpä cóogøch tyijy yajxonñ ngapxy nmädia'agy.

18 Nmäbøjcäm ja'a mädia'agy hajxy jaduhñ coo Jesucristo hajxy xñähho'túutäm cruzcøxp. Pønjaty häda'agaamb møjcu'uhaam, coo hajxy miädoy coo Jesucristo hajxy tøø xñähho'túutäm cruzcøxp, ñäxiicypy hajxy jaduhñ je'eguiøxpä cooc tyijy ja-gooyyá cädieeyhäna'c-hajxy yagho'ogyii cruzcøxp.

19 Jaduhñ jimñ myiññ cujaay maa Diosmädia'aguiän:

Ja'a häna'c-hajxy cuwiinmahñdypä, ja'a tyijy hajxy howyiinmahñdymøødpä, cábøchä wyiinmahñdyhajxy nyajtsoobaadaañä,

nømä Dios miänaañ. 20 Hoorä, yajcähxø'piä Dios coo jäya'ay wyiinmahñdyhajxy quia'a tsoobaada'añ, ja'a hajxy niñänøømäbä cuwiinmahñdy, ja'a tyijy hajxy howyiinmahñdymøødpä. Ñäxiicypiä Dios jaduhñ. 21 Jaančh tehñ

quiuwiinmahñdiä Dios tu'uquiä. Je'e jaduhñ mänaan coo højts ja'a miädia'agy nyajwá'xämät coo Jesucristo hajxy xñähho'túutäm. Pønjaty jaduhñ mäbøjp, Dios jaduhñ wiinmahñdyhajt

coo hajxy jaduhñ yajñahwa'adsóøjät ja'a piojpä quiädieeyhajxy, hoyyä jäya'ayhajxy näje'e jia näxi'igy. Ca'a yhöjts nhamdsoo wiinmahñdyhaam ja'a Dios ja'a miädia'agy hajxy xyajwiinjuóøyyäm. Jaduhñä Dios miänaañ.

²² Ja'a judíoshajxy, coogä hoy-yagjuóøñäbä hajxy yhíxät, mänítäc tyijy hajxy jaduhñ miäbøga'añ. Y ja'a griegohajxy, mänítäc tyijy hajxy jaduhñ miäbøga'añ coogä jäya'ay miädia'agy hajxy miädóowät, ja'a hajxy niñänóømäbä cuwiinmahñdy, ja'a tyijy hajxy howyiinmahñdymøødpä. ²³ Pero højtshájtäm, jaduhñ højts nmädiáacäm coo Jesucristo hajxy xñähho'túutäm cruzcøxp. Cabä judíoshajxy jaduhñ miäbøcy. Cab hajxy jaduhñ miäna'añ cooc tyijy Jesucristo quia'a Dioshuungä. Hix, nõm hajxy miäna'añ cooc tyijy ja'a Dioshuung quia'a ho'oga'añ cruzcøxp. Hoorä, ja'a jäya'ayhajxy ca'a judióspä, ni je'e hajxy quia'a mäbøjpä. Hoñäxiicnä Diosmädia'agy hajxy miädoy. ²⁴ Pero coo Dios hajxy tøø xwyiimbíiwäm, paady hajxy nmäbøjcäm coo Jesucristo hajxy xñähho'túutäm, hoy hajxy nja judíosäm. Coo hajxy jaduhñ xñähho'túutäm, jaduhñä Dios yajcähxø'cy coo mäjaa miøødä, coo quiuwiinmahñdiä. ²⁵ Coo Dios ja'a yHuung ñähdujcy coo yagho'ogóøjät, paadiä jäya'ayhajxy näje'e miäna'añ cooc tyijy Dios quia'a cuwiinmahñdiä, cooc tyijy mäjaa quia'a møødä. Cabä Diosmädia'agy hajxy miäbøcy, paady hajxy jaduhñ miäna'añ. Hoyyä Dios ja'a wiinmahñdy häxøpy weeñtiä jia møødä, ni jaduhñä jäya'ay wyiinmahñdyhajxy häxøpy quia'a najtspaadøøyyä.

Jaanä jaduñduhmbä, hoyyä Dios ja'a mäjaa häxøpy weeñtiä jia møødä, ni jaduñnä jäya'ay miäjaahajxy häxøpy quia'a najtspaadøyyä.

²⁶ Hermanodøjc, huuc mädown hajxy, mänaa mijts Dios xwyiimbiiyyän, cab hajxy hänajty nämay mhøxpøquiä, näjé'eyyäm; cab hajxy hänajty nämay mmäyøøjä, näjé'eyyäm; cabä møjcuhtujt hajxy hänajty nämay mmøødä, näjé'eyyäm.

²⁷⁻²⁸ Nmäbøjcäm ja'a Diosmädia'agy hajxy. Xpiéjxäm jäya'ay hajxy hijty coo hajxy hijty nga'a høxpøquiäm, coo hajxy hijty nga'a mäyøøjäm, coo møjcuhtujt hajxy hijty nga'a møødhájtäm. Xxiøøghájtäm ja'a jäya'ay hajxy hijty jaduñ. Pero coo Dios hajxy xwyiimbíiwäm, jaduñnä Dios ja'a jäya'ay yajtsähdiuundägajch, ja'a hajxy hijty xpiéjxämbä. Jaduñnä Dios yajcähxø'cy coo hajxy hänajty tøyhajt quia'a høxpøquiä, coo hajxy hänajty tøyhajt quia'a mäyøøjä, coo møjcuhtujt hajxy hänajty tøyhajt quia'a møødä.

²⁹ Hix, cab jaduñ pøn jim ñiguiumayáanänä Dioswiinduum. ³⁰ Dios hajxy jaduñ xpiädáacäm tu'ugmädia'agy møødä Jesucristo. Jaduñnä Dios yajcähxø'cy coo quiuwiinmahñdiä coo Jesucristo yaa quiejxy hädaa yaabä naaxwiin, coo hajxy hoy xñähho'túutäm. Jaduñ hajxy xyajnhwáatsäm ja'a nbojpä ngädieyhájtäm. Jaduñ hajxy xpiädáacäm hawa'adstuum.

³¹ Jaduñnä Diosmädia'agy miäna'añ: “Cab hajxy hamdsoo nniguiumáayyämät. Tsøgå Dios hajxy møj jaançh pädáacäm.”

2

¹ Hermanodøjc, mänáajøch mijts

nnähooçhooñän, mänáajøch mijts ja'a Diosmädia'agy nyajwiingapxøøçhooñän, cab mijts yajxón nmøødmädiaacy. ² Cooçh hänäjty jim nnøcxa'añ maa mijtsän, tøøçh hänäjty nwiinmahñdyhaty coo Jesucristo hajxy hänäjty nyajmøødmädia'aga'añ, coo hajxy hänäjty je'e tøø xñähho'túutäm cruzcøxp. Cábøch wiingmädia'agy hänäjty nmädia'aga'añ. ³ Nnajuøøbiøch hänäjty cooçh hänäjty hoy nga'a capxa'añ ja'a nhamdsoo copc-háamhøch. Høxtä tsähgøøbiøch hänäjty; høxtä tsäyúubiøch hänäjty. ⁴ Hóyhøch hänäjty yajxón nga'a jagä mädia'agy, xpiuhbéjþøch ja'a Dioshespíritu hänäjty ja'a miäjaahaam neby hajxy jaduhñ ca'xy mwiinjuø'øwät. ⁵ Hix, chojpiä Dios ja'a jioot jaduhñ coo miädia'agy hajxy mmäbøjçät. Ja'a miäjaahaamä Dios hajxy xyajmäböcy, ca'a quiuwiinmahñdyhäna'c hajxy jaduhñ xyajmäbøjp.

⁶⁻⁷ Ja'a häna'c-hajxy cuwiinmahñdypä hädaa yaabä naaxwiimbä, cábøch hajxy jaduhñ xñänømy cooçh nguwiinmahñdiä. Jadúhñhøch häna'c-hajxy xñänøømbä cooçh nga'a cuwiinmahñdiä, ja'a møjcuhdujtmøødpähajxy ja'a hädaa yaabä naaxwiimbä, ja'a Diosmädia'agy hajxy ca'a mäbøjþä. Mänitä miäjaahajxy piögáanäxä møødä wyiinmahñdyhajxy coo hädaa yaabä naaxwiimbä hänäjty quiuhdägoyya'añ. Pønjetiä Diosmädia'agy ca'xy cudiumb, ñajuøøby hajxy jaduhñ coo Dios tøyhajt quiuwiinmahñdiä. Paady hajxy jaduhñ ñajuø'øy cooçh jaduhñ tøø nyajmøødmädia'agy coo Jesucristo hajxy tøø xñähho'túutäm, møød coo hajxy jim nnøcxáanäm Dioswiinduum. Jequiän ja'a Dios

jaduhñ wyiinmaayy. Cahnä naaxwiimbä hänäjty yhawijy tiøø'xta'agy. Cabä Dios ja'a wyiinmahñdy choj yajwiingähxø'cy. Cahnä hajxy xyajwiinjuøøyyäm høxtä jäda'anäbaadyñä. ⁸ Pero cabä møjcuhtmøødpähajxy jaduhñ wyiinjuøø'owa'añ. Coø hajxy cu wyiinjuøøyy, cabä Jesucristo hajxy cu miøjpahbejty cruzcøxp. Piädaac ja'a Dios ja'a yHuung jaduhñ coø yaa wyiingudsähgø'øwøjät hädaa yaabä naaxwiin. ⁹ Jaduhñä Diosmädia'agy miäna'añ:

Ni pøn quia'a hixyñä, ni quia'a mädoynä,
ni quia'a wiinmayñä nebiatiä Dios hoyhajt ween-
hajt mio'owa'añ pøn jaduhñ chojpy.

¹⁰ Ja'a højtshájtäm, tøø Dios hajxy xyajwiin-
juøøyyäm ja'a yhEspírituhaam nebiaty jaduhñ
wyiinmahñdyhajty. Yhøxtaabiä yhEspíritu jaduhñ
neby hajxy hoy xyajwiinjuøøyyämät.

¹¹ Cabä wiinghäna'c jaduhñ xñajuøøyyät nebiaty
hänäjty mwiinmay. Jagooyyä miich mhamdsoo
juøhñdy jaduhñ ñajuøø'owät. Jaanä jaduhñä
Diospä, cab jaduhñ pøn ñajuøøbiä nebiatiä Dios
wyiinmay. Jagooyyä Dios yhamdsoo Espíritu
jaduhñ ñajuøø'y. ¹² Tøø Dios ja'a yhEspíritu
hajxy xmióoyyäm coø højts ja'a miädia'agy
jaduhñ nmäbøjcäm. Ja'a yaabä juøhñdy, cab
jaduhñ miäbaady nebiä Dios ja'a yhEspíritän.
Paady hajxy jaduhñ xmióoyyäm, jaduhñ hajxy
xyajnajuøøyyäm coø hoyhajt weenhajt hajxy
xñä'ä móoyyäm. ¹³ Jaduhñä jäya'ay hajxy
nhawaandägájtäm coø hajxy jaduhñ xñä'ä
móoyyäm. Jaduhñ hajxy nhawáanäm nebiatiä
DioshEspíritu hajxy xyajwiinjuøøyyäm. Jaduhñ

hajxy nyajwiinjuøødiägájtšäm je'eguiøxpä coo Dioshespíritu hajxy miøødhajpä. Ja'a häna'c-hajxy tyijy cuwiinmahñdypä, cabä wiinmahñdy hajxy ca'xy miøødä coo tijaty mädia'agy hajxy hänajty xyajmøødmädia'aga'añ. Paadiä wiinmahñdy hajxy ca'xy quia'a møødä coo Dioshespíritu hajxy quia'a møødä. Pero højts, cab højts nmädiácäm ja'a nhamdsoo wiinmahñdyhaam.

¹⁴ Pønjatiä Dioshespíritu ca'a møød, cab hajxy wyiinjuø'øy nebiatiä Dioshespíritu hajxy jia wi'i yajmøødmädia'aga'añii. Cábäc tyijy jaduhñ choobaady. Hix, coo Dioshespíritu hänajty mga'a møødä, cab jaduhñ mnä'ägädä wiinjuø'øwät nebiä Dioswiinmahñdy. ¹⁵ Pønjatiä Dioshespíritu møød, quiøxy wiinjuøøby hajxy jaduhñ. Pønä Dioshespíritu ca'a møød, cabä cuhdujt hajxy miøødä coo hajxy miäná'anät cooc tyijy jäya'ay ja'a Diosmädia'agy hajxy hoy quia'a yajnähixø'øy, ja'a jäya'ay ja'a Dioshespíritu hajxy møødpä. ¹⁶ Jaduhñ jim myiñ cujaay maa Diosmädia'aguiän: “Cabä Dios wyiinmahñdy pøn ñajuøøyyä. Cabä Dios pøn yajnähixø'øyii.” Pero nmøødhájtäm ja'a Jesucristo wyiinmahñdy hajxy jaduhñ.

3

¹⁻² Hermanodøjc, cooçh jim nhooçhohñ maa mijtsän, cáboçh mijts tsipjaty nyajnähixøøyy. Ja'a ca'a tsipjátypøch mijts jaduhñ nyajnähixøøyy. Hix, je'enä hajxy hänajty mhityñä nebiä naamdägø'øybän maa Jesucristocøxpän. Jaduhñ hajxy hänajty mhity nebiä Diosmädia'agy ca'a mäbøjpän. Cahnä hajxy hänajty may mwiinjuø'øyñä maa Dioshespíritucøxpän. Y

høxtä jäda'anäbaadyñä, cahnä hajxy jaduhñ may mwiinjuø'øyñä. ³ Je'enä hajxy mniwyyinhecy mniwyyiindoyiinä coo hajxy mga'a hity tu'ugmädia'agy. Cab hajxy jaduhñ mnichocy mnimiee'xyii. Je'enä hajxy jaduhñ mjäya'ayhaty nebiä Diosmädia'agy ca'a mabøjpän. ⁴ Näje'e hajxy mmäna'añ: "Høøch ja'a Pablo miädia'agy nbanøcxäp." Näje'e hajxy mmänaambä: "Høøch ja'a Apolos miädia'agy nbanøcxäp." Coo hajxy jaduhñ mga'a hity tu'ugmädia'agy, cähxø'p jaduhñ coo hajxy jaduhñ mjäya'ayhatyñä nebiä Diosmädia'agy ca'a mabøjpän.

⁵ Høøch Pablo, cábøch møjcuhdajt nmøødä. Ni ja'a Apolos jaduhñ quiaa møødäbä. Cab jaduhñ yhäxø'øy coo højts nmädia'agy hajxy jaduhñ xyajtsibøøyyät. Jue'e højts, Dios højts jaduhñ xñä'ä moonsähajp. Dios højts jaduhñ xquiejx coo mijts jaduhñ nyajnäxixø'øwät. Jaduhñ hajxy mmabøjcy ja'a Dioscøxpä. Cøjwiinduum højts ja'a Dios ja'a tuung xmiooyy. ⁶ Høøch mijts ja'a Diosmädia'agy nyajnäxixøøchohn. Mänitä Apolos hajxy jaduhñ xjiaac yajnäxixøøyy. Pero Dios, je'e mijts jaduhñ xyajmäbøjc. Y tehngahnä hajxy xjiaac yajmäbøga'añ. Tehngahnä hajxy xjiaac yajmayø'øwa'añ. ⁷ Høøch Pablo, cábøch møjcuhdajt nmøødä. Ni ja'a Apolos jaduhñ quia'a møødäbä. Jagooyyä Dios møjcuhdajt miøødä. Je'eduhñ tu'ug xyajmäbøgäp. Je'eduhñ tu'ug xyajmayø'øwäp. ⁸ Tu'ugmädiä'agyhøch ja'a Apolos nmøødhity, hoy højts cøjwiingtuung nja møødä. Coo højts hoy ndúnät, mänitä Dios møjmayhajt tiúnät maa højtscøxpän. Pero coo højts hamuumdu'joot

nga'a túnät, mänitä Dios mayhajt hánajty weeñtiä tiunaambä maa højtscøxpän. ⁹ Højts ja'a Dios nmøødtuumby. Y coo mijts hoy mjäya'ayhaty, jaduhñä jäya'ay tøyhajt hajxy miøødä coo Dios hajxy hoy xyagjäya'ayhaty. Mijts ja'a Dios ja'a mwiinmahñdy xyajtägájtsäp neby hajxy jaduhñ mhídät nebiatiä jioot chocy.

¹⁰⁻¹¹ Tøøchä Dios xwyiinguexy coo mijts ja'a miädia'agy nyajñähixøøyyät ja'a Jesucristocøxpä. Xmiøoyhøchä wiinmahñdy jaduhñ nébiøch mijts jaduhñ hoy nyajñähixø'ød. Cabä cuhdujt jaduhñ myiñ coo pøn ja'a Dios miädia'agy yajtägájtsät ja'a Jesucristocøxpä. Ween hajxy jaduhñ yajñähixøøbiä nébiøch tøø nyajñähixø'øyän. ¹² Pønjetiä Diosmiädia'agy mæbøjp, jaduhñ hajxy tiuunghaty nebiä jäya'ayhajxy jaduhñ miädoyhádät ja'a Jesucristocøxpä. Näje'e hermanodøjc-hajxy hoy tiuñ. Paady hajxy jiaanç tehñ quiimayii. Jiiby hajxy näje'e, cab hajxy hoy tiuñ. Paady hajxy jaduhñ quia'a cumayii. ¹³⁻¹⁴ Coo Jesucristo hánajty yaa quiädaactägatsa'añ, mänit jaduhñ quiähxø'øga'añ pønjaty hánajty hoy tøø tiuñ. Cøjxta'axiøø ja'a Dios jiahmiedsa'añ neby hajxy hánajty hoy tøø tiúñäbä. Møjmayhajt ja'a Dios tiunaambä maa häna'c hoy tøø tiuñän. Jaduhñ je'e quiähxø'øgaambä pønjaty hánajty hoy tøø quia'a tuñ. Cabä Dios mayhajt tiuna'añ maa häna'c hoy tøø quia'a túñäbän. ¹⁵ Hawa'adstuum hajxy yaghida'añii, pero hobiä nejpiä.

¹⁶ Jaduhñ hajxy nmäbáatäm hädaa hajxy njoothájtämbä nebiä Diostøjcän coo Dioshespíritu hajxy nmøødhájtäm maa hädaa njoodootyhajxiän.

Mnajuøøby hajxy jaduhñ, túhmäts. ¹⁷ Pønjaty haxøøg nä'ägädä jäya'ayhajp, hoyyä Dioshespíritu hajxy jia møødä jioodooty, päda'agáanäp hajxy hajøøxc. Hix, coo ja'a Dioshespíritu hajxy mmøødä ja'a mjoodooty, páadiäts mjoot hajxy wa'ads myaghídät. Hix, cabä Dioshespíritu hoñä'a maajä yhida'añ majaty hánajty quia'a wa'adsä.

¹⁸⁻¹⁹ Näje'eg tyijy mijts madiu'u mnajuø'øby neby hädaa yaabä naaxwiimbä wiinmahñdy myiñ. Cab hajxy hamdsoo mniguiumayøød coo hajxy mjaty coo hajxy mnajuø'øby. Nømä Dios miäna'añ cooc hädaa yaabä naaxwiimbä wiinmahñdy quia'a tsoobaady. Hahixøøby jaduhñ coo mhamdsoo wiinmahñdy hajxy mnajtshixøøñät, coo hajxy jaduhñ mnibiäda'agøøjät nebiä ca'a wiinjuøøbiän. Jaduhñ ja'a Dioswiinmahñdy hajxy hoy mwiiñjuø'øwät nebiä tiøyyän. Jaduhñ jim myiñ cujaay maa Diosmädia'aguiän: “Dios yajcumädowaamb ja'a häna'c jaanç tehñ jiajpä mäwiinhøøn.” ²⁰ Jaduhñ jim myiimbä cujaay maa Diosmädia'aguiän: “Ñajuøøbiä Dios coo jäya'ay wyiinmahñdyhajxy quia'a tsoobaady, ja'a hajxy tyijpiä cuwiinmahñdy.” ²¹⁻²² Näje'e jäya'ayhajxy ñiguiumayii je'eguiøxpä coo jäya'ay miädia'agy hajxy pianøcxä ja'a tyijy tøyhajtmøødpä. Cab hajxy jaduhñ mbahíxät. Mijtsøxpä Dios cøxiä yhädiuñ tijaty yaa hijp hädaa yaabä naaxwiin. Møød højts ja'a Dios jaduhñ xyhädiuumbä ja'a mijtsøxpä, højts yajnahixøøbiädøjc, møød høøçh, møødä Apolos, møødä Pedro. Paadiä Dios jugyhajt hajxy xmióoyyäm neby hajxy jaduhñ hoy nyajtuungpáatämät. Hoy hajxy cu nja hó'cäm,

hoy hajxy nyajtuungpaadaánäm tijaty jada'ahaty jájtáp túunáp, chaads tijaty jadaánáp tunáanáp, je'eguiøxpä coo Diosmädia'agy hajxy nbanøcxäm. ²³ Hix, coo Jesucristo hajxy mWiindsønhaty, paadiä miädia'agy hajxy myajtuunä. Y jaduhnä Jesucristobä, yajtúunäbä Tieedy miädia'agy je'ebä.

4

¹ Cab højts møjcuhtujt jaduhn nmøødä, ni høøch ni Apolos; xñä'ä moonsähajp højts ja'a Jesucristo jaduhn. Dios højts jaduhn tøø xwyiinguexy coo højts ja'a Diosmädia'agy ca'xy ngapxtówät, mädyijaty ja'a jäya'ayhajxy hijty jegyhajty quia'a wiinjuøby. ² Mäduhñtiä jäya'ay mioonsähadyii, tsipcøxp hajxy quiudiúnät neby hajxy yhane'emyii. Paady højts jaduhn ngudiunaambä neby højts ja'a Dios tøø xwyiinguexy. ³⁻⁴ Pero høøch, cábøch jaduhn tii nmøjpäda'agy coøch pøn waambaty xñänómät pø hóyhøch nyajnahixø'øy, pø caj. Hóyhøch cu nja mäna'an coøch hoy nyajnahixø'øy, cab jaduhn choobaada'añ. Tu'uquiä Jesucristo jaduhn ñajuø'øy pø hóyhøch njaançh yajnahixø'øy. Y høøch, coøch hamdsoo nniñänómójøät pø hóyhøch nyajnahixø'øy, pø caj, cábøch nmädia'agy jaduhn choobáadät. Cábøch nnajuø'øy pø hóyhøch tøø nyajnahixø'øy, pø caj. Pero, cab jaduhn ñejiä pø nnajuø'øbiøch, pø cábøch nnajuø'øy. Ja'a Jesucristo tu'uquiä nägapxaamb pø hóyhøch tøø nyajnahixø'øy, pø caj. ⁵ Caj pøn nä'ä nägoobä mnä'ä nänómät coo tøø quiädieey pø cabä tøyhajt hánajty mnä'ä møødä. Coo Jesucristo yaa quiädaactägátsät, mänit hánajty jaduhn yajcähxø'øga'añ neby hajxy

nwiinmahñdyhájtäm, nebiaty hajxy hänäjty hamee'ch tøø njäya'ayhájtäm. Mänitä Dios hajxy xquiumayáañäm coo hajxy hänäjty hoy tøø ngudiúuñäm.

⁶ Páadyhøch cham tøø nmädia'agy ja'a høøchcøxpä møødä Apoloscøxpä neby højts nyajñähixø'øy, cáboch njoot jaduhñ chocy coo hajxy jaduhñ mnänómät coo tu'jäya'ay jiaty, coo tu'jäya'ay quia'a jaty. Pønjetiä Diosmädia'agy yajñähixøøby, je'ečh jaduhñ nnänøømby coo hajxy jaduhñ mga'a nänómät. ⁷ Cab jaduhñ yhooyä coo hajxy mniguiumayøøjät. Hix, Dios mäjaa hajxy jaduhñ xmiooby neby hajxy jaduhñ hoy mmädúnät. Cab jaduhñ yhooyä coo hajxy mmáná'anät coo hajxy hamdsoohaamby mbaady. Caj mijts pøn xñänømy cooc tyijy mijts mjaančh tehñ miøj mjaančh tehñ jiaančhä.

⁸ Nøm mijtsäda'a hamdsoo mniñänømyii cooc tyijy Jesucristo mmäbaatnä nej yhojiäya'ayhatiän, y cooc tyijy ja'a Diosmäjaa hajxy mjaančh tehñ miøødä. Jaduhñ mäwiin mijts mnibiädáacänä nebiä jäya'ayhajxy hanehm̄bän, cooc tyijy mijts cuhdujt mmaas møødä que højts. Pero mgapxtägooby hajxy jaduhñ. Hoy hijty jaduhñ coo hajxy cu mhanehmy. Näguipxy hajxy jaduhñ cu nhanéhm̄äm. ⁹ Pero højts Diosquexypä, jaduhñ mäwínhøch ndijy højts Dios xpiädaacy nebiä cuhdujtmøød ca'a hidaambän. Jaduhñ mäwiin højts xpiädaacpä nebiä cädieeyhána'c yagho'oga'añijän. Hijxwiinduum højts jaduhñ njaančh tehñ chaačhpøcy. Ja'a Diosmoonsähajxy tsajpootypä, je'e højts jaduhñ xyhijxp, møødä

jäya'ayhajxy hädaa yaabä naaxwiimbä. ¹⁰ Nømä jäya'ayhajxy miäna'añ cooc tyijy højts tii nga'a jaty nga'a najuø'ø. Paady højts jaduñ xñänømy coo højts ja'a Jesucristo miädia'agy nyajwa'xä. Pero mijts, mjaanč tehñ ñiguiumáayyap hajxy jaduñ cooc tyijy mijts ja'a Dios xjiaanč tehñ yajwiinjuø'ø ja'a Jesucristocøxpä. Jaduñ højts jäya'ayhajxy xñänømbä cooc tyijy højts Diosmäjaa nga'a møødä. Pero mijts, mjaanč tehñ miøød ja'a Diosmäjaa tyijy. Mijts ja'a jäya'ayhajxy xñä'ägä wiingudsähgøøby. Pero højts jäya'ay xjiaanč tehñ piejxp xjiaanč tehñ tiehmb cooc tyijy højts tii nga'a jaty nga'a najuø'ø. ¹¹ Jaguiay jayhu'ugy højts naxy nhity homiänaaxøøjä. Hagøødsø'ø højts nwit nducxy naxy nmäwädity. Xjiaanč tehñ chaačhtiuumb højts jäya'ayhajxy yaa homiänaaxøøjä. Cab højts tsänaadiaact maa tøø nmøødhaty ni mänaa. ¹² Hamdsoo cøøhaam hamdsoo tecyhaam højts nduñ nxajy. Jaduñ højts nnägaayyøøc nbaady. Coø højts jäya'ay naxy xñänømy haxøøgjaty, cab højts ndsippäda'agy nma'adpäda'agy. Yajxón højts nhadsoy. Coø højts jäya'ay naxy xyajtsaačhpøcy, nmee'xtujpy højts jaduñ. Cab højts waamb jaduñ nnä'ägädä mäna'añ. ¹³ Coø højts jäya'ay naxy xñähwaambety nä'a nägoobä, mee'xxieemy højts jaduñ njaanč tehñ yhadsoy. Høxtä jäda'anäbaadyñä højts jäya'ay xyhixy nebiä hujts nebiä haayän.

¹⁴ Hermanodøjc, jadúhñhöch mijts njuøøñä nebiä hamdsoo huungän. Páadyhöch mijts jaduñ nmägapxy nhane'emy. Cáböch mijts jaduñ nyajtsähdiuna'añ. ¹⁵ Hoy mijts häna'c

xjia yajnáhixø'øy nämay ja'a Jesucristocøxpä, høøch mijts jaduñ tu'uquüä xtieedyhajp ja'a Jesucristocøxpä, je'eguiøxpä cooch mijts jayøbajt nyajnáhixøøyy coo Jesucristo hajxy tøø xñähho'túutäm, y coo jadähooc jiuypiojtägajch. ¹⁶ Jadúñhøch mijts nja nämaya'ay cooch hajxy jaduñ xpiahíxät.

¹⁷ Y ja'a Timoteo, jadúñhøch je'e ndsocy nébiøch nhamdsoo huungän ja'a Jesucristocøxpä. Pedyii jaduñ jiaanç tehñ quiudiuñ ja'a Diosmädia'agy. Páadyhøch jim tøø nguexy maa mijtsän nébiøch mijts jaduñ xjahmiejtstä'agät coochä Jesucristo nbanøcxy. Wiinduhmyhagájpthøchä Jesucristo miädia'agy nyajwiingapxøøyyä maa tsajtøjcän. ¹⁸⁻¹⁹ Høøch, mobädájpøch jim nnøcxaambä maa mijtsän coo Dios jaduñ miänä'anät. Cabä jäya'ayhajxy näje'e miäbøcy cooc tyijy jaduñ jim nga'a nøcxa'añ, je'eguiøxpä cooc tyijy njaanç tehñ chähgø'øy. Paady hajxy jiaanç tehñ ñiguiumayii. Howiaambaty hajxy jiaanç tehñ miäna'añ. Pero cooch jim jaduñ njaanç nøcxät maa mijtsän, mänitøch jaduñ jim nhixa'añ pø jaanç tøyhajt ja'a Diosmäjaa hajxy jiaanç møødä, ja'a hajxy jaduñ niguiumáayyabä. Paady hajxy ñiguiumayii cooc tyijy ja'a Diosmäjaa hajxy jiaanç tehñ miøødä. ²⁰ Je'e jaduñ jaanç tehñ choobaatp coo Diosmädia'agy hajxy hoy mgudiúnät. Cab jaduñ choobaady coo hajxy nä'ä nägoobä mnä'ä xi'ig mnä'ä mädiá'agät. ²¹ Nøcxáambøch jim maa mijtsän. Coo mhaxøøgcuhdujt hajxy mnajtshixø'øwät, mänitøch hajxy hoy yajxón

nmøødmädiá'agät. Pero pø cabä mhaxøøgcuhdujt hajxy nnajtshixø'øwa'añ, nmøødhøch cuhdujt jaduñ coo hajxy nyajcumädówät.

5

¹ Tøøch nmädoyhaty coo tuljäya'ay haxøøg jiaanč tehñ jiatcø'øy maa mijtsän, hoyyä Diosmädi'agy hajxy mja mäsøcy. Yhamdsoo huudájác jaduñ miøødtsänaaby. Ni pøn jaduñ quia'a jatcø'øy, ni ja'a cajpä jiidíoshajxy. ² Hahixøøby jaduñ coo yø'øya'ay hajxy mga'a mägu'ughájñät. Cu mhojy hajxy jaduñ. Jaduñ hajxy cu mjootmayhajty. Pero cab hajxiäda'a waamb tøø mnä'ägädä näma'ay. Höchähdiuunnä jaduñ coo hajxy mga'a hojy. Cab jaduñ yhojy coo hajxy mniguiumayii. ³⁻⁴ Hóyhøch jim nga'a jagä hity maa mijtsän, nmøødhøch cuhdujt jaduñ cooç mijts nhané'emät ja'a Jesucristocøxpä coo jaaya'ay hajxy mga'a mägu'ughájñät, ja'a yhamdsoo huudaj jaduñ miøødtsänaabiä. Mänit hajxy myajpädsómät coo hajxy hánajty mhamugø'øy. Díøshøch ja'a cuhdujt jaduñ xmiooyy cooç mijts jaduñ nhané'emät. ⁵ Cab hajxy jim myajméjtsnät maa tsajtøjcän. Ween jaduñ chaächtiuñii ja'a møjcu'ugóngäm. Weñdä jaduñ yhuuc tehñ wyiinmahñmédsät coo haxøøg jiatcø'øy. Mänit jaduñ ñähwá'adsät ja'a piojpä quiädieey. Mänit jaduñ jim ñøcxpät tsajpootyp coo Jesucristo yaa quiädaactägátsät, ja'a nWiindsønähjtämbä.

⁶ Cab jaduñ yhojy coo hajxy myajcumáyät. Huuc mädown hajxy, coo jäya'ay tsajcaagy hajxy yajcojy, mänitä chooy hajxy piädaacä harinajooty.

Mänit hajxy yajmätijwäditø'øy. Mänitä harina chooy yajtägø'øyii. ⁷ Paadiä craa hajxy mga'a yajméjtsnät maa tsajtøjcän coo mijts jaduñ mnä'ä pahíxpät ja'a haxøøgpä. Jaduhñ mijts jaduñ mga'a padu'udägóobiät. Hix, tøø Jesucristo hajxy xñähho'túutäm. Jaduhñ nbojhájtäm ngädieeyhájtäm hajxy xyajnáhwáatsäm. ⁸ Jaduhñds je'e, tsögä haxøøgpä hajxy najtshixóyyäm. Tsögä tøyhajtpä hajxy hamuumdu'joot hoy yajtu'uyóhyäm.

⁹ Tøøch mijts ja'a nocy tu'ug nyajnájaayø'øy coo hajxy mga'a mägu'ughádät ja'a jäya'ayhajxy haxøøgwädijpä. ¹⁰⁻¹³ Je'eçh jaduñ nnänøømby pønda'a tyijy tuumb hermano. Cab hajxy jaduñ mmägu'ughádät ja'a hajxy wiingto'oxiøjc pawädijpä, møød hajxy jäya'ajie'e hadsojpä, møød ja'a quepychech hajxy wiingudsähgøøbiä, møød hajxy jäya'añähwaambejpä, møød hajxy jaduñ müucäp wädijpä, møødä jäya'ayhajxy mee'tspä. Ni jäya'ay jaduñbä hajxy mga'a møødcáyät, pøn tyijy jaduñ tuumb hermano. Tsipcøxp hajxy jaduñ jim mhøxquejxpädsómät maa tsajtøjcän, pønjaty jaduñ haxøøgwädijpä. Pero cab højts cuhdujt nmøødhájtäm maa jäya'aguiøxpähajxiän, ja'a hajxy ca'a tuumbä hermano, hoy hajxy jaduñ jia wädijpä haxøøg. Dios jaduñ najuøøby nebiä tsaachpä hajxy mio'owa'añii. Homiajatiä jäya'ay hajxy nbáatäm ja'a hajxy haxøøgwädijpä, møød ja'a jäya'ajie'e hajxy hadsojpä, møød ja'a mee'tspähajxy, møød ja'a quepychech hajxy wiingudsähgøøbiä.

6

1 Hermanodøjc, coo mijts hānajty mniñāxø'øwø'øwa'añii, jim hajxy mnøcxät maa Dios quiu'ugän; cab hajxy jim mnøcxät maa cuduunghajxiän, ja'a Diosmädia'agy hajxy ca'a mabøjpä. Jaduhnä hermanohajxy näje'e jiatcø'øy. 2 Tøgä cab hajxy mnajuø'øyä coo højts jäya'ayhajxy nägøxiä nyajtøyhajtyegäänäm ja'a hädaa yaabä naaxwiimbä, coo Jesucristo quiädaactägätsät. Paady hajxy hānajty jaduhn ndunäänäm coo Dios hajxy xquiu'ughätäm. Hoorä, pø myajtøyhajtyegaamby hajxy hānajty jaduhnä, tii hajxy coo mga'a jajpä yajtøyhajtyec mädyiibä ca'a tsipjaty. 3 Tøgä cab hajxy mnajuø'øyä coo Diosmoonsäbaady hajxy nyajtøyhajtyegäänämbä, ja'a hajxy jim hijpä Dioswiinduum. Jaduhnds je'e, hoy hajxy jaduhn nyajtøyhajtyéjcämät mädyiijaty hädaa yaabä naaxwiimbä. 4 Pø jii hajxy tijaty myajtsibø'øy ja'a hädaa yaabä naaxwiimbä, tii hajxy jim coo nøcxy myajtødiägø'øy maa hajxy ca'a mabøjpän. 5 Höchähdiuunnä hajxy jaduhn mjatcø'øy. Jii jajpähäna'cäda'aduhñ maa mijtsän tu'ug metsc. Je'eduhñ xyajtødiägø'øyyäp ja'a mdsiphajxy, hermanodøjc. 6 Cab jaduhn yhooyä coo hajxy hamiñ haxøpy mniñāxø'øwø'øwø'øjät maa cuduunḡän, ja'a Diosmädia'agy ca'a mabøjpä.

7 Coo hajxy hānajty tijaty myajtsibø'øy, myacähxø'py hajxy hānajty jaduhn coo Diosmädia'agy hajxy hoy mga'a cudiuñ. Maas hoy hit jaduhn coo pøn xmiägädiéeyät, coo pøn xmiäméedsät, cab hajxy mnäxø'øwø'øwät. 8 Pero cab jaduhn yhooyä coo hajxy mnimiägädieeyø'øjät, coo hajxy mn-

imiämeedsóøjät, haagä hermanodøjc.

9 Tøgä cab hajxy mnajuø'oyä coo haxøøghäna'c-hajxy jim quia'a tægø'owa'añ maa Dioswiinduumän. Tøyhajt jaduhñ. Jue'eçh jaduhñ nnänøømby ja'a haxøøgjäya'ayhajxy, ja'a hajxy nimiøødtsänáayyäbä jabiøcy, møød hajxy quepychech naaxpoch wiingudsähgøøbiä, møød hajxy wiingjäya'ay tio'oxiøjc møødtsänaabiä, møødä jäya'ay miäya'adiøjc møødtsänaabiä, 10 møødä mee'tspähajxy, møød hajxy jäya'ajie'e hadsojpä, møød hajxy múucäp wädijpä, møød hajxy wi'i quiapxpä, møød hajxy mee'tspä høhñda'agyhaam. Pønjaty jaduhñ jatcøøby, cab hajxy jim tiægø'owa'añ maa Dioswiinduumän. 11 Jaduhñ hajxy hijty näje'e mbajatcøøbiä. Pero tøø Dios ja'a mbojpa mgädieeyhajxy xyajnáhwa'açh ja'a yhEspirituhaam maa Jesucristocøxpän, ja'a hajxy nWiindsønähajtämbä. Jaduhñä Dios hajxy tøø xpiädáacäm coo hajxy hoy nwädíjtämät, coo hajxy hoy njäya'ayhájämät nebiä jioot jaduhñ chocy.

12 Jaduhñä jäya'ayhajxy näje'e miäna'añ coogä cuhdujt jaduhñ myiñ cooc hajxy hotyijatiä ndúunämät nnájxämät. Tøyhajt jaduhñ. Pero cab jaduhñ xyhahixøøyyämät coo hajxy cøxiä wiinä ndúunämät nnájxämät. Y cab hajxy ndehm yaghanájxämät nebiä nwiinmahñdy hajxy hoy nhøxhíjxämät. 13 Paadiä Dios jøø'xytiøjc caadiøjc hajxy xmióoyyäm coo hajxy jaduhñ ngáayyämät coo hajxy jaduhñ nhúucämät. Pero nä'a mädøyyä hajxy ngáayyämät nhúucämät, cab hajxy ngaayyhanájxämät. Pero cab jaduhñ

ñejpiä pø cáayyäm pø ca'a ngáayyäm; hix, ñä'ägädä yajcuhdägoyyaambiä Dios je'e. Paadiä Dios hajxy xpiäáacäm coo miädia'agy hajxy ngudiúunämät. Pero cabä jioot jaduñ chocy coo hajxy haxøøg nwädíjtämät. ¹⁴ Nebiä Dios ja'a yHuung yagjujypiøjquiän, jaanä jaduñ højts xyagjujypiøgáañämbä ja'a miäjaahaam.

¹⁵ Huuc mädown hajxy, coo Jesucristo hajxy nWiindsøn hájtäm, paady jaduñ quia'a nä'ägädä hoyyä coo cuhñdo'oxiøjc hajxy nmøødmáawämät. ¹⁶ Jaduñä Diosmädia'agy miäna'añ, coo jäya'ayhajxy ñimiøødma'awøøjät, jaduñä Dios yhixy nebiä tu'ugpä jäya'ayän. Jaduñds je'e, coo cuhñdo'oxiøjc hajxy nmøødmáawämät, jaduñä Dios hajxy xyhíjxäm nebiä tu'ugpä jäya'ayän. ¹⁷ Pero coo Jesucristo miädia'agy hajxy nbanøcxämät, tu'ugjoot tu'ugwiinmahñdy ja'a Jesucristo hajxy jaduñ nmøødhíjtämät.

¹⁸ Cabä cuhñdo'oxiøjc hajxy mmøødmá'awät; haxøøg jaduñ. Hoy hajxy nej cu mja jatcøøw, cabä mni'x cabä mgopc nej jiaty jádät. Pero coo cuhñdo'oxiøjc hajxy mmøødmá'awät, mnä'ägädä mägädiehbiä mhamdsoo ni'x ja'a mhamdsoo copc hajxy jaduñ. ¹⁹ Nej, cab hajxy mnajuø'øyä coo Dioshespíritu jiiby yhity mjuøhñdiootyhajxiä. Dios hajxy jaduñ xmiooyy. Jaaya'ay hajxy jaduñ xyhuunghajp, paadiä miädia'agy hajxy myajtúunät; cabä mhamdsoo cuhdujt hajxy myajtúnät. ²⁰ Paady hajxy xyhuunghaty coo yHuung hajxy xñähho'tuuty. Paady hajxy hoy mwädítät, jaduñ hajxy

myajcähxó'ogät coo Dios miøjjä jiaančhä.

7

¹ Hoorä, tsøg hajxy mädiäacäm waambátyhøch mijts xmiäyajtøøyy nocyhaam. Hoy hit jaduhñ coo ya'adiøjc ja'a to'oxiøjc quia'a møødtsäná'awät.

² Pero coo hajxy hānajtý mga'a mee'xtuga'añ, maas hoy hit jaduhñ coo to'oxiøjc hajxy mnä'ägädä pógät, y weenä to'oxiøjc ja'a ñihyhap miøødhájpät.

³⁻⁴ Ja'a pøcyjiäya'ayhajxy, hamiñ haxøpy hajxy ñimiøødma'awøøjät. Cabä cuhdujt hajxy mmøødä maa mhamdsoo ni'xhajxiän. Hix, pø xmiøødma'awaambä mjamiøød jaduhñ, naxy mdehm miøødmá'awät, cab jaduhñ mnimiøjjø'ogøøjät.

⁵ Jaduhñ hajxy mnä'ägädä cuhdujthädät coo møjcu'ugong hajxy xñä'ä yajtu'udägóyyät. Coo hajxy jaduhñ nämetsc mmäná'anät coo Dios hajxy mba'yá'axät,

mānit jaduhñ yhooyä coo hajxy mga'a nimiøødma'awøøjät hamiñ haxøpy. Hoorä, coo Dios hajxy hānajtý tøø mba'ya'axy, mānit hajxy mnimiøødmáawägombät. Mānitä møjcu'ugong hajxy jaduhñ xquia'a yajtu'udägóyyät.

⁶ Cábøch jaduhñ nmāna'añ coo hajxy mädsibø'øbä mbógät. Nñä'ä móobiøchä cuhdujt jaduhñ.

⁷ Maas hoy hit jaduhñ coo hajxy jaduhñ mnä'ägädä hídät nidiuhm nébiøch høøch jaduhñ nhitiän. Pero cøjhaminø'øý ja'a Dios hajxy tøø xpiädäacäm. Nāje'e hajxy tøø xpiädäacäm coo hajxy nidiuhm nhíjtämät, nāje'e caj.

⁸ Jaduhñds je'e, pøñ jaduhñ nidiuhmhajpnä, jaduhñ ñä'ägädä mähmó'øwät nidiuhm nébiøch høøch nhitiän. Y jaanä jaduhñduhmbä, ja'a

yaamgto'oxyhajxy, cab hajxy piøjtägätsät. ⁹ Pero pø cab hajxy mmee'xtuga'añ, maas hoy hit jaduhñ coo hajxy mbógät, coo cuhhiñdo'oxiøjc hajxy xñä'ä yajcuhhínät.

¹⁰ Pero pønjaty jaduhñ tøø piøjnä, cham hajxy nmägapxy nhane'emy. Ca'a yhøøch nhamdsoo mädia'agyhädaa; Diosmädia'agyhädaa. Cab jaduhñ yhooyä coo to'oxiøjc ja'a ñihyhap piuhwá'adsät.

¹¹ Pero coods jaduhñ piuhwá'adsät, cabä wiingya'adiøjc wyiingpógät. Maas hoy coo ñihyhap ñä'ägädä nämejtstägätsät. Y ja'a ya'adiøjc, jaanä jaduhñ je'ebä, cabä tio'oxiøjc yhøxmädsät.

¹² Chámhøch njaac mädia'aga'añ. Ja'a nhamdsoo mädiá'agyhøch hädaa; cab jaduhñ jim myiñ cujaay maa Diosmädia'aguiän. Pø jii ya'adiøjc tu'ug mäbøjpä, pø cabä tio'oxiøjc miäbøcy, cabä tio'oxiøjc yhøxmädsät pø jaac møødtsäna'awáanäp ja'a tio'oxiøjcäm. ¹³ Jaanä jaduhñduhmbä, pø jii to'oxiøjc mäbøjpä, pø cabä ñihyhap miäbøcy, cabä ñihyhap ñähgué'egät pø jaac møødtsäna'awáanäp ja'a ñihyhápäm. ¹⁴ Coo ya'adiøjc ja'a Diosmädia'agy hñajty quia'a mäbøcy, yaghoyøøyyäp je'e ja'a tio'oxiøjcäm je'eguiøxpä coo tio'oxiøjc miäbøcy. Jaanä jaduhñduhmbä, coo to'oxiøjc ja'a Diosmädia'agy hñajty quia'a mäbøcy, yaghoyøøyyäp je'ebä ja'a ñihyhápäm je'eguiøxpä coo ñihyhap miäbøcy. Coo hajxy jaduhñ yhodiiumä, paadiä yhuunghajxy jaduhñ yhodiiumäbä. Pø cabä tiaj tieedy häxøpy nidu'jaya'adiä quia'a mäbøcy, cab hajxy häxøpy yhodiiumäbä. ¹⁵ Pøn jaduhñ mäbøjpä, coo jiamiøød ja'a ca'a mäbøjpä hadsip miäná'anät coo hajxy

ñiyhøxmadsojät, ween hajxy jaduhñ ñiyhøxmaçhi. Jaduhñ jiájcombät nebiä tøø quia'a pøquiäbä. Hix, chojpiä Dios jioot jaduhñ coo hajxy hoy nhíjtämät. ¹⁶ Pøñ jaduhñ mäbøjp, cab jaduhñ yajnajuø'ø y pø yajmäbøgaambytiä ja'a jiamiøød ja'a ca'a mäbøjpa.

¹⁷ Cøjhaminø'ø y ja'a Dios hajxy tøø xpiädáacäm. Jaduhñ hajxy jootcuje njaac híjtämät neby hajxy hánajty nhíjtäm mänaa Dios hajxy xyajnáhdijjäm coo hajxy nmäduúnämät. Hädaa mädiá'agyhøch homiaajä nyajnáhixøøby majatiä hermanodøjc-hajxy yhamugø'øyän Dioswiingudsähgøøbiä. ¹⁸ Højts judíos, coo Jesucristo miädia'agy hajxy nbanøcxäm, cab hajxy ndsähdiuúnämät, hoy hajxy nja judíoshájtäm. Y ja'a jäya'ayhajxy ca'a judíospä, ja'a Jesucristo miädia'agy hajxy panøcxpä, ni je'ehajxy quia'a tsähdiúnät, hoy hajxy quia'a ja judíoshaty. ¹⁹ Cab jaduhñ ñejpiä pø mjudíoshájp, pø caj. Je'e nä'ägädä tsoobaatp coo Dios miädia'agy mgudiuúnät. ²⁰ Jaduhñ hajxy mjaac hídät neby hajxy hánajty mhitiän mänaa Dios hajxy xyajnáhdijjiän coo miädia'agy hajxy mmäbøjcät. ²¹ Näje'e mijts jäya'ay xjie'ehaty nebiä waj nebiä cuaayän, hoyyá Diosmädia'agy hajxy mja panøcxy. Cab hajxy jaduhñ mmøjpadá'agät. Pero pø cabä mwiindsøn hajxy xyajtunaannä, ween hajxy xyhøxmajtsnä. ²² Tøø mijts ja'a Dios xyajnáhdijy coo miädia'agy hajxy mmäbøjcät, hoyyá jäya'ay hajxy hánajty xjia je'ehaty nebiä waj nebiä cuaayän. Hix, tøø Jesucristo hajxy xyajnáhwáatsäm ja'a nbojphájtäm ja'a ngädieeyhájtäm. Hoorä, pønjaty hánajty ca'a je'ehájtäp jaduhñ nebiä waj nebiä

cuaayän mänaa hajxy yajnähdijijän ja'a Diósäm coo miädia'agy hajxy miäbójcät, moonsä hajxy je'e tiúnäp ja'a Jesucristocøxpä. ²³ Tøø Jesucristo hajxy xñähho'túutäm, paadiä Dios miädia'agy hajxy nmäbójcänä. Cabä jäya'ay miädia'agy hajxy nmäbójcänät. ²⁴ Jaduhnds je'e, hermanodøjc, jaduhñ hajxy mjaac hídät neby hajxy hänäjty mhitiän mänaa Dios hajxy xyajnähdijijän coo miädia'agy hajxy mmäbójcät. Jaduhñä Dios hajxy hoy mmädúnät.

²⁵ Myajtøøw hajxy jaduhñ pø hahixøøby jaduhñ coo cäxyiihäna'c-hajxy piógät. Høøch nhamdsoo mädia'agy hädaa; cab jaduhñ jim myiñ cujaay maa Diosmädia'aguiän. Pero hahixøøby jaduhñ coöch mijts nmädia'agy xmiäbójcät; hix, Dióshøch jaduhñ tøø xyajnähdijy coöch nmädúnät. ²⁶ Pues høøch jaduhñ mänaamb coo jaduhñ yhahixø'øy coo hajxy mga'a pógät, je'eguiøxpä coo tsø'ty häyohn wiädiñnä jäda'ahaty. ²⁷ Pø jii mdo'oxiøjc, caj mhøxmádsät. Y pø cabä to'oxiøjc mmøødä, ca'a mhøxta'ay. ²⁸ Cab jaduhñ yhaxøøgä coo mbógät; y coo cäxyiihäna'c jaduhñ piógät, ni jaduhñ quia'a haxøøgä. Pero coo hajxy jaduhñ piógät, maas hamäjaa jiugyhajt hajxy miänaxa'añ. Páadyhøch jaduhñ nja mäna'añ coo hajxy quia'a pógät.

²⁹ Hermanodøjc, jue'eçh jaduhñ nja mäna'ana'añ, ja ween quia'a habaady coo Jesucristo yaa quiädaactägatsa'añ hädaa yaabä naaxwiin. Cab hajxy yaa jejcy njaac tunäänäm. Jaduhnds je'e, pønjaty to'oxiøjmøød, jaduhñ hajxy xyiicta'ag miädiaactá'agät nebiä Dios hajxy hoy miädúnät. Cabä yhuung tio'oxy hajxy ñädaj

ñámáañät. ³⁰ Pønjaty jaduñ jootmayhajp, ween hajxy jaduñ quia'a jootmayhajná. Pønjaty jaduñ xoonḁaap, ween hajxy jaduñ quia'a xoonḁaacná. Y ja'a hajuubiädøjc-hajxy, ween hajxy jaduñ yhity nebiä toogy hajxy ca'a møødpän. ³¹ Pønjaty jaduñ yaa tsánaaby häyoob hädaa yaabä naaxwiin, ween hajxy jaduñ yhity neby hajxy tii ca'a møødpän. Hix, hädaa yaabä naaxwiin, neby hajxy cham nhíxäm, cøxaamb hädaaduñ quiuhdägoyya'añ.

³² Jadúñhøch njoot chocy coo hajxy tii mga'a nādaj mga'a námáyät. Ja'a ya'adiøjc nidiuhmhajpä, caj tii ñādajy ñamay. Jagoo tiajy miay nebiä Dios hoy miädúnät. ³³ Pero ja'a craa to'oxiøjmøødpä, je'e tiajpy miaaby nebiä yhuung nebiä tio'oxy hoy miøødhídät. ³⁴ Y cabä Dios hoy miäduna'añ. Jaaná jaduñä cäxyihäna'c-hajxypä, cab hajxy tii tiajy miay. Jagoo hajxy tiajy miay nebiä Dios hajxy hoy miädúnät. Hamuumdu'jootä Diosmädia'agy hajxy quiudiuna'añ. Pero ja'a to'oxiøjc ja'a ya'adiøjmøødpä, nebiä ñihyhap hoy miøødhídät, je'eyyä ñä'ä tajpy ñä'ä maaby.

³⁵ Páadyhøch jaduñ nmäna'añ, mijts jaduñ nja puhbedaan. Caj mijts jaduñ nhane'ema'añ. Pero chójpíøch njoot jaduñ coo hajxy hoy yajxón mwädítät, coo Diosmädia'agy hajxy hamuumdu'joot mgudiúnät.

³⁶ Pø jii mhuunghajxy tøø quiäxyijø'ø, ween hajxy piøcy, pø chojpy mjoothajxy jaduñ. Cab jaduñ yhaxøøgä coo hajxy jaduñ piøgät. ³⁷ Pero pø cabä mjoothajxy chocy coo hajxy piøgät, ween hajxy jaduñ quia'a pøcy. Hix, cabä cuhdujt

põn miøødä coo miich xyhané'emät maa mhuungcøxpän. ³⁸ Hoyjaduhñ coo mhuung myajpógät. Jaaná hoy jaduñmbä coo mga'a yajpógät; cab jaduññ nejpiä.

³⁹ Ja'a to'oxiøjc ya'adiøjmøødpä, cabä cuhdujt miøødä coo wiingpä miøødtsänä'awät. Pero coo ñihyhap yhó'ogät, mänit mäbøcy wyiingpógät pøn jaduhñ chojpy. Pero tsipcøxpä hermano wyiingpógät. ⁴⁰ Pero maas jootcujc yhidät coo quia'a nä'ägädä pøjtägätsät. Høøch jaduhñ mänaamb. Ja'a Dioshespíritøch ndijy jaduhñ xñajtsapxøøyyäp.

8

¹ Näje'eçh hajxy tøø xmiäyajtøy pø hoy jaduhñ coo animalho'ogy hajxy ndsú'tsämät ja'a häna'c-hajxy quepychechwiinduum yojxypä. Tøyhajt jaduhñ coo hajxy nägøxiä tøø nmädoyhajtäm hädaagøxpä. Cab jaduhñ yhoyyä coo hajxy nmänäänämät cooc tyijy hajxy cøxiä nwiinjuøøyyäm. Jaduhñä häna'c-hajxy näje'e miänaambä, ja'a hajxy yajcumayaambä. Pero coo hajxy hamiñ haxøpy nniçhojc nnimié'e'xämät, mänitä Diosmädia'agy hajxy maas hoy nmäbøjcämät. ² Pøn jaduhñ mänaamb cooc tyijy hotyijä jiaty, hønndaacp jaduhñ. Cab jaduhñ tiøyyä coo hotyijä jiaty. Ween jaduhñ jiaac habøcy. ³ Pønä Dios jaduhñ wiingudsähgøøby, ñajuøøbiä Dios jaduhñ pøn je'e.

⁴ Tsøg hajxy jadähooc jaac mädiäacäm pø hoy jaduhñ coo animalho'ogy hajxy ndsú'tsämät, ja'a häna'c-hajxy quepychechwiinduum yojxypä. Bueno, nnajuøøyyäm hajxy coo quepychech naaxpoch quia'a jujyquiä. Y nnajuøøyyäm hajxy

coo Dios tiu'ugä. ⁵ Mayyä jäya'ayhajxy jaduhñ miäna'añ cooc tyijy ja'a Dioshajxy miayyä jim tsajpootyp chaads yaa hädaa yaabä naaxwiin. Je'eg hajxy jaduhñ jiaanç wiingudsähgøøby. ⁶ Pero højts jaduhñ mänáañäm coo Dios tiu'ugä, ja'a nDeedyhájtäm. Je'e jaduhñ hädiuun cøxiä näguipxy møødä yHuung. Paady hajxy jaduhñ xquiunú'xäm xpiadáacäm coo hajxy jaduhñ ween nwiingudsähgøøyyäm. Jaduhñ hajxy nmänáañäm coo Jesucristo hajxy nWiindsønhájtäm. Cabä wiingpä hajxy nwiindsønhájtäm. Møød je'e cøxiä yhädiuumbä. Høxtä højtspaadyhájtäm hajxy xquiunú'xäm.

⁷ Pero cabä jäya'ayhajxy nägøxiä miäbøcy coo quepychech quia'a jujyquiä, coo naaxpoch quia'a jujyquiä. Näje'e jäya'ay quepychech naaxpoch hajxy wyiingudsähgø'øyñä. Y coo hajxy jaduhñ chú'udsät tijaty jäya'ayhajxy yojxyp quepychechwiinduum, jootmayhajp hajxy jaduhñ cooc tyijy jaduhñ quia'a hoyyä coo hajxy chú'udsät. Hix, je'enä hajxy jaduhñ miäbøcyñä cooc tyijy quepychech jiujyquiä. ⁸ Nnajuøøyyäm hajxy coo Dios quia'a møjpäda'agy pø ndsú'tsäm pø caj ndsú'tsäm. Cab jaduhñ ñejpiä pø ndsú'tsäm pø caj ndsú'tsäm. ⁹ Pero hoy hajxy nja najuøøyyäm jaduhñ coo quia'a nejpiä pø ndsú'tsäm pø caj ndsú'tsäm, maas hoy hit jaduhñ coo nga'a tsú'tsämät, pø jii hermanohajxy näje'e quia'a najuøøbiä coo jaduhñ quia'a nejpiä coo hajxy ndsú'tsämät. ¹⁰ Tsøc mädiáacäm coo miich mnajuø'øy coo jaduhñ quia'a nejpiä coo yø'øduhmbä tsu'uçh mdsú'udsät. Hoorä,

tsøc mänáanäm coo miich yø'øduhmbä tsu'uçh hänäjty mdsu'uçh maa quepychechwiinduumän. Hoorä, coo hermano jaduñ tu'ug xyhíxät, ja'a ca'a najuøøbiä coo jaduñ quia'a nejpiä coo miich jaduñ mdsú'udsät, wehndä je'e xpiadsú'tspät. Wehndä miäná'anät cooc tyjy jaduñ tøø quiädieey coo jaduñ tøø xpiadsu'uçh. ¹¹ Y coo jaduñ quiädiéyät, miichä pojpä hänäjty mmøød je'eguiøxpä coo miich hänäjty jim mgay. Hix, tøø mähdiøjc ñähho'tu'udyii ja'a Jesucristäm. ¹² Y coo miichä mähdiøjc jaduñ myajcädiéyät, jaduñ hänäjty tøø piaady nejpä miichä Jesucristo hänäjty tøø mmägadieeyän. ¹³ Hoorä, pø cädieeyaambä hermano tu'ug je'eguiøxpä cooch høøch yø'øduhmbä tsu'uçh ndsu'uçh, cábøch jaduñ nnä'ägädä tsú'udsät mänaa, coo hermano ñä'ä cädiéyät.

9

¹ Cáboch pøn xyhane'emy, túhmäts. Dióshøch xwyiinguejx, túhmäts. Hamdsoöchä Jesucristo nhijxy, túhmäts, ja'a hajxy nWiindsøn'hájtämbä. Mijts ja'a Diosmädia'agy nyajmøbøjc, túhmäts. ² Näje'e jäya'ayhajxy miäna'añ cooc tyjy høøchä Dios tøø xquia'a wiinguexy. Pero mmøødä tøyhajt hajxy jaduñ coöchä Dios tøø xwyiinguexy, je'eguiøxpä cooch mijts nyajmøbøjcy ja'a Diosmädia'agy.

³ Cooch pøn mänaa xñäma'ay cooc tyjy høøchä Dios tøø xquia'a wiinguexy, jadúñnhøch naxy nhadsoy: ⁴ Nmøødhøch ndijy cuhdujt jaduñ cooch mijts cay hu'ugy nmäyujwá'anät je'eguiøxpä coöchä Diostuung nduñ. ⁵ Ja'a Jesucristo

yhuchhajxy, miøødä cuhdujt hajxy je'e coo hajxy wiädítät to'oxiøjmøød. Jaduhnä Pedro miøødäbä, møødä Dioswiinguexypähajxy. Jadúhnhøch cuhdujt nmøødäbä, hoyyä jäya'ayhajxy näje'e jia mäna'añ cooc tyijy høøch nga'a møødä. ⁶ Tøgä mmänaamb mijts jaduñnä coo højts cuhdujt nga'a møødä coo højts nduung nnajtshixø'øwät, coo højts ja'a Diosmädia'agy nyajwá'xät, høøch møødä Bernabé. Ja'a Diosquexyhajxy nägøxiä, tøø tiuung hajxy ñajtshixø'øy coo Diosmädia'agy hajxy yajwa'xy. ⁷ Yajmäjuuby hajxy je'e, y jaduñ højts nyajmäjuyaambä. Hix, yajmäjuubiä soldadohajxy. Y jaanä jaduñduhmbä, ja'a cudsaatypcamhajxy, jiøø'xypä tsaatyptsa'am hajxy. Y jaanä jaduñduhmbä, ja'a meegcueendähajpähajxy, yhuucypiä meegtsi'tsnøø hajxy. ⁸ Ca'a yhøøch nhamdsoo mädia'agy hädaa; jaduñnä mädia'agy miänaambä ja'a Moisés jecy quiujáhyyäbä. ⁹⁻¹⁰ Jaduhn jim myiñ cujaay: “Cabä waj mhaxuu'tsø'øgät coo trigopajc hänajty tiehñjo'oçh.” Coo Dios jaduñ jecy miänaañ, jaduñ miänaañ coo højts nyajmäjúyät. Hix, ja'a häna'c naaxpuhbähajxy møødä tsijpädøjc-hajxy, ñajuøøby hajxy jaduñ coo hajxy yajmäjuya'añ. Jaanä jaduñ højtspä, jaduñ højts nyajmäjúubiät. ¹¹ Coo højts mijtsä Diosmädia'agy tøø nyajnähixø'øy, paady hajxy xmiäjúyät. ¹² Mmäjuubiä Diosquexy hajxy, túhmäts; maas may højts cuhdujt nmøødä coo højts mijts xmiäjúubiät.

Pero cahnä højts mänaa nmäna'aññä coo højts nyajmäjúyät. Choippy højts njoot jaduñ coo Diosmädia'agy wiá'xät, ja'a Jesucristocøxpä,

paady hõjts nhity jamiäjuy. ¹³ Pero nmøød hõjts cuhdujt jaduñ coo hõjts nyajmäjüyät. Hix, ja'a häna'c-hajxy jim tuumbä tsajtøgooty, miøødä cuhdujt hajxy je'e coo hajxy quiáyät tijatiä cu'ughajxy jim quiuyoxøøby maa altarän. ¹⁴ Jaanä jaduñduhm̄bä, tøø Dios yhane'emy coo Diosmädia'agy-yajwa'xpähajxy yajmäjüyät. Ja'a jäya'ayhajxy mädoobä, je'eds hajxy jaduñ mäjüyap. ¹⁵ Pero høøch, cábøch mänaa tøø nmäna'añ cooch mijts xmiäjüyät. Jadúñhøch njoot chocy cooch jamiäjuy ndúnät. Y cooch häyaa nnä'ä yuuhó'ogät, cab jaduñ ñejpiä, nägooch hänäjty tøø nduñ jamiäjuy.

¹⁶ Näje'e jäya'ayhajxy yajcumaya'añ je'eguiøxpä coo Diosmädia'agy hajxy yajwa'xy. Pero Dióshøch xwyiinguejx cooch nyajwá'xät høøch; cábøch hamdsoojoot nyajwa'xy. Paady, cábøch nyajcumaya'añ. Y coochä Diosmädia'agy jaduñ nga'a yajwá'xät, xyajcumádówäbøchä Dios jaduñ. ¹⁷ Cábøch hamdsoojoot ndägøøyy Diosmädia'agy-yajwa'xpä. Dióshøch jaduñ xwyiinguejx cooch miädia'agy nyajwá'xät. Cooch häxøpy tøø ndägø'øyy hamdsoojoot, mänitøch cu nyajmäjuuyy. ¹⁸ Jaanč tehñ xioondáacpøch jaduñ coochä Diosmädia'agy nyajwa'xy jamiäjuy, hóyhøchä cuhdujt nja møødä cooch cu nyajmäjuuyy.

¹⁹ Hix, cooch jaduñ nduñ jamiäjuy, cábøch pøn xyhane'emy. Pero chójpiøch njoot jaduñ cooch hoy piønä xyhané'emät, nägoo Diosmädia'agy hajxy miäbógät. ²⁰ Cooch jim nhijty maa judíoshajxiän, jadúñhøch nguhdujthajpä

nebiä judíoshajxy quiuhdujthatiän, weenä Diosmädia'agy hajxy jaduhñ cu miäbøjcy. Y cooch jimñ nhijty maa jäya'ayhajxy hñajty yhane'emyiijän ja'a Diosmädia'agy, ja'a Moisés jecy quiujáhyyäbä, jadúhñhøch nyaghanehmbä neby hajxy hñajty yaghanehmbän, weenä Diosmädia'agy hajxy jaduhñ cu miäbøjcy, hóyhøchä cuhdujt nja nmøødä cooch nga'a yaghané'emät. ²¹ Y cooch jimñ nhijty maa jäya'ayhajxiän, ja'a cajpä judíospä, ja'a mädia'agy hajxy ca'a cudiuumbä, ja'a Moisés jecy quiujáhyyäbä, jadúhñhøch nguhdujthajpä neby hajxy hñajty quiuhdujthatiän, weenä Diosmädia'agy hajxy jaduhñ cu miäbøjpä. Cábøch nmäna'ana'añ coochä Dios ja'a miädia'agy hñajty nga'a mäbøjcä. Hix, nmäbøjcäbøchä Jesucristo miädia'agy jaduhñ. ²² Y cooch jimñ nhijty maa hermanohajxiän, ja'a Diosmädia'agy hajxy ca'xy ca'a wiinjuøbiä, jadúhñhøch nbaguhdujthajpä neby hajxy hñajty quiuhdujthatiän, je'eguiøxpä cooch hñajty nyajnähxø'øwa'añ nebiä Diosmädia'agy hajxy maas hoy wyiinjuø'øwät. Majátyhøch jaduhñ nwädity Diosmädia'agy-yajwa'xpä, cábøchä jäya'ayhajxy jaduhñ nyagjootma'ady, weenä Diosmädia'agy hajxy jaduhñ miäbøcy. ²³ Páadyhøch jaduhñ nguhdujthaty, jadúhñhøchä Diosmädia'agy hoy nyajwá'xät. Y coochä jäya'ayhajxy may nyajmäbøgät, mänítøch jaduhñ nxooñdá'agät.

²⁴ Coö jäya'ayhajxy naxy ñiyhøxpäyø'øgyii, tu'jäya'ay jaduhñ nøcxy quiuhäyø'øgy, ca'a

ñägøxiä. Tøyhajt jaduhñ. Jaduhñ mäwiin højtshájtäm, coo Diosmädia'agy hajxy nbanøcxäm, naxy hajxy hoy ndehm quiudiúunämät, jaduhñ hajxy jim nnøcxämät Dioswiinduum.
²⁵ Høxtahm̄dsä häyø'päðøjc-hajxy, tu'jøjpiä jioot ja'a wyiinmahñdy hajxy naxy piäda'agy coo hajxy jaduhñ quiuhäyø'øgät, túhmäts. Paadiä haxøøgpä hajxy jaduhñ quia'a nä'ägä nähdoñ. Premio hajxy jaduhñ móoyäp, y cab jaduhñ ñä'a jecy. Pero højtshájtäm, coo Diosmädia'agy hajxy hoy njaanç tehñ quiudiúunämät, mänit hajxy jaduhñ jim nnøcxämät Dioswiinduum. Jim̄ds hajxy jaduhñ nhíjtämät cøjxta'axiøø. ²⁶ Ja'a häna'c cuhäyø'päðøjc-hajxy, tøyyä hajxy jaduhñ ñä'a päyø'øgy, cab hajxy jaduhñ yhimybiäyø'øgy miaamybiäyø'øgy. Ja'a boxeadorhajxy jajpä mägox mädex, cab hajxy jaduhñ ñä'a yemy ñä'a wopy. Jaduhñ mäwíinäts høøch, tu'jøjpiøchä Diosmädia'agy nbanøcxy. ²⁷ Cábøchä haxøøgpä jaduhñ nnä'ägä nähdoñ. Ngudiúumbiøchä Diosmädia'agy jaanç tehñ yhoy. Páadyhøchä Dios jim xyajnøcxa'añ maa wyiinduumän. Y cooç jaduhñ hoy nga'a cudiünät, cábøch jim xyajnøcxät, hóyhøchä jäya'ayhajxy hánajty tøø nja yajwiinhixø'oy.

10

¹ Hermanodøjc, huuc mädown hajxy jaduhñ. Jéquiänä Dios ja'a joc ja'a näma'a jaduhñ quiejxy maa nhaphájtäm maa ndeedyhájtämhajxy hánajtiän, møødä Moisés. Mänit hajxy jaduhñ jecy piadu'ubøjcy nägøxiä näwiinä. Mänit hajxy nägøxiä ñøønajxy coo Tsaptsmejy paquiä tiøøch.

² Ja'a Moisés hajxy hānajt̃y nāguipxy miøødwādijpy nāgøxiā maa joc hajxy hānajt̃y piawāditiān, maa hajxy ñøønajxiān Tsaptsmejjiooty. ³ Mānitā Dios hajxy miooyyā ja'a cay ja'a hu'ugy. Mānit hajxy quiaaayy nāgøxiā. ⁴ Mānitā Dios ja'a tsa tu'ug yajtsābijty. Mānitā nøø tiägøøyy xee'xpā. Mānit hajxy nāgøxiā ñøøhuucy. Jaduhñ māwínāts ja'a Cristo neby yø'ø tsaajān. Hix, puhbéjtāp hajxy hānajt̃y ja'a Crístām majaty hajxy hānajt̃y wiādity. Ja'a Cristo, Dios yHuung je'e. ⁵ Pero cabā Diosmādia'agy hajxy hoy nāmāy quiudiuuñ. Cabā Dios hajxy jaduhñ quiumaayyā. Paady hajxy jim̃ tiu'uhø'cy pactuum.

⁶⁻⁷ Paady hajxy jaduhñ jiajty yhabejty coo haxøøgpā hajxy yhadsojcy, coo quepychech ja'a naaxpoch hajxy wyiingudsāhgøøyy. Hijxtahñd jaduhñ coo hajxy nga'a pahijx nga'a padúunāmāt. Jaduhñ jim̃ myiñ cujaay maa Diosmādia'aguiān: “Mānit hajxy quiaaayy yhuucy quepychechwiinduum; mānit hajxy yhejch piujty quepychechwiinduum.” ⁸ Nāje'e hajxy haxøøg jiatcøøyy. Paady hajxy nāhii'xtägøøg mil yho'cy tu'xøøbā. Paady hajxy jaduhñ nga'a pahijx nga'a padúunāmāt. ⁹ Nāje'e Dios hajxy yhiixmajch pø tøyhajt hajxy hānajt̃y yajcumādowa'añíjām ja'a Dios. Mānit hajxy chahñchu'tsā. Cøjx hajxy je'e yho'ogy. Paady hajxy jaduhñ nga'a pahijx nga'a padúunāmāt. ¹⁰ Nāje'e hajxy hānajt̃y jootcuyc quia'a hity, je'eguiøxpā coo hajxy hānajt̃y quia'a mābøcy. Paadiā Dios ja'a mioonsā quiejxy, hoy hajxy yagho'ogyii.

¹¹ Paady hajxy jaduhñ jiajty yhabejty, hijxtahñd

jaduh_n coo hajxy nga'a pahijx nga'a padúunämät. Paady cujaay yhity. Hix, habáatnáp jaduh_n coo Jesucristo yaa quiádaactägatsa'añ. ¹² Pøn jaduh_n niñánóømäp coo hamuumdu'joot miábøcy, naxy tiehm ñiyajcopcø'øwøøjät coo ñä'ä tu'udägóyyät. ¹³ Mijts ja'a møjcu'ugong xjia wi'i yajtu'udägoyyaamb. Hoy piønä jaduh_n jia yagjatcø'øwa'añii haxøøg. Pero jaduh_nä Dios miäna'añ cooc hajxy xpiuhbedáañäm, neby hajxy jaduh_n nga'a tu'udägóyyämät. Tøyhajt jaduh_n coo hajxy xpiuhbedáañäm. Hix, cabä møjcu'ugongä miäjaa jaduh_n miäbaady nebiä Dios mäjaa miøødän.

¹⁴ Jaduh_nds je'e, hermanodøjc, cabä quepychech, cabä naaxpoch hajxy mwiin-gudsähgø'øwät. ¹⁵ Mnajuøøby hajxy jaduh_n cooch tøyhajt nmädia'agy. Hix, mwiinjuøøby hajxy hädaaduh_n. ¹⁶ Coos tsuugay nyagjätäm mänaa vino hajxy nhúucäm, mänitä Dioscujú'uyäp hajxy nyéjcäm. Je'e jaduh_n ñänøømby coo hajxy tu'ugcopc tu'ugwiinmahñdy nhíjtäm, je'eguiøxpä coo Jesucristo ñø'ty jiaanç teh_m yaghäyooyy mänaa hajxy je'e xñähho'túutäm maa hädaa yaabä naaxwiinän. Y coo tsajcaagy hajxy nyajniñäguidøøyyäm, je'e jaduh_n ñänøømgumbä coo hajxy tu'ugcopc tu'ugwiinmahñdy nhíjtäm, je'eguiøxpä coo Jesucristo ja'a ñi'x ja quiopc ñähdujcy mänaa hajxy je'e xñähho'túutäm. ¹⁷ Coos tu'ugpä tsajcaagy hajxy ngaamiújcäm, paady hajxy tu'ugcopc tu'ugwiinmahñdy nhíjtäm, hoy hajxy nja nämáyyäm.

¹⁸ Jaduh_nä judíoshajxy yhijpä tu'ugcopc

tu'ugwiinmahñdy møødä Dios mänaa animal hajxy chu'učän, ja'a jäya'ayhajxy yojxypä altarwiinduum. ¹⁹ Jadúhñhøch nmäna'añ coo quepychech naaxpoch quia'a jujyquiä. Jadúhñhøch nmänaambä coo animal quia'a cunuuxiä ja'a jäya'ayhajxy yojxypä quepychechwiinduum. ²⁰ Caj pues. Ja'a jäya'ay ja'a Diosmädia'agy hajxy ca'a mabøjpä, coo animal hajxy yoxy quepychechwiinduum, ja'a møjcu'ugong hajxy jaduhñ wyiingudsähgøøby, ca'a Dyiosä. Cábøch njoot chocy coo jäya'ay hajxy mmøødhídät tu'ugwiinmahñdy, ja'a møjcu'ugong hajxy wyiingudsähgøøbiä. ²¹ Pø mhü'ugaambiä vino hajxy ja'a Dioscøxpä, cab hajxy hoy mhú'ugät ja'a møjcu'ugongcøxpä. Pø mgayaambiä tsajcaagy hajxy ja'a Dioscøxpä, cab hajxy hoy mgáyät ja'a møjcu'ugongcøxpä. ²² Cab jaduhñ yhoyyä coo Dios hajxy nyagjootmá'tämät. Hix, maas mäjaamøødä Dios que højtshájtäm.

²³ Jaduhñä jäya'ayhajxy miäna'añ cooc cuhdujt hajxy nmøødhájtäm hoy ñejpiä. Tøyhajt jaduhñ. Pero cab jaduhñ yhawiinmatsä coo hajxy hoy ñejpiä njatcøøyyämät. Hix, coo hajxy hoy ñejpiä njatcøøyyämät, cabä Diosmädia'agy hajxy hoy nyajtu'uýóhyämät. ²⁴ Näje'e jäya'ayhajxy yhøxta'ay coo hajxy chänä'awät coo hajxy yhäyówät. Pero maas hoy jaduhñ coo nmädøjc hajxy nbuhbéjtämät.

²⁵ Tsu'udsä tsu'učh hajxy jaduhñ mädyiijaty jim tóo'cäp halaplazpa'c. Pero cab hajxy myajtówät pø tøø jäya'ay animal hajxy yoxy quepychechwiinduum. Cab hajxy je'eduhñ mnä'ä taj mnä'ä máyät

ja'a tsu'učhcøxpä. ²⁶ Hix, jaduñä Diosmädia'agy miädia'agy: “Dios jie'e hädaa cøxiä maa hädaa yaabä naaxwiimbän.”

²⁷ Coo pøñ hajxy jaduñ xwiówät mägaabiä, hoy jaduñ coo hajxy mnócxät, hoyyá craa ja'a Diosmädia'agy hñajty quia'a jagä mábøcy. Y cab hajxy myajtówät pø tøø animal hñajty quepychechwiinduum yoxyii. Cab hajxy mdaj cab hajxy mmáyät ja'a tsu'učhcøxpä. ²⁸ Pero coo pøñ hajxy jaduñ xyhawáanät coo häna'c yø'ø animal hñajty tøø yoxy quepychechwiinduum, cab hajxy jaduñ mdsú'udsät, weenä craa jaduñ quia'a jootma'ady ja'a hajxy tøø xyhawáanäbä. Jaduñä craada'a tiajy miay coo jaduñ quia'a hoyyá coo yø'øduhmbä tsu'učh hajxy ndsú'tsämät, ja'a häna'c yojxypä quepychechwiinduum. ²⁹ Ja'a craa tøø xyhawáanäbä, je'ečh jaduñ nnänøømby coo wehñä jiootma'ada'añ. Cábøch jaduñ nmäna'ana'añ coo mijts mjootma'ada'añ.

Näje'e jäya'ayhajxiäda'a miäna'ana'añ: “Ween yø'ø craa jaduñ ñä'ä jootma'ady, nmóødhøch cuhdujt jaduñ coochä animal ndsú'udsät, hoy häna'c tøø jia yoxy quepychechwiinduum. ³⁰ Haa ca'a, nnämäabiøchä Dios Dioscujú'uyäp coochä tsu'učh hñajty tøø ndsu'učh. Tiičh yø'ø craa jaduñ coo xñä'ä näma'ay cooch nga'a tsú'udsät.”

³¹ Jaduñds je'e, tsögä mädia'agy hajxy hoy yajxón yajtuun yaghítäm homiädyiibä coo hajxy ngaayy coo hajxy nhúucäm. Coo jäya'ay hajxy jaduñ xyhíxämät coo mädia'agy hajxy hñajty hoy yajxón nyajtuun nyaghítäm homiädyiibä, mñitä Dios hajxy miøjpäda'aga'añ jiaančpäda'aga'añ.

³² Hix, coo mädia'agy hajxy hoy yajxón nyajtuun nyaghíjtämät homiädyiibä, ni pøn jaduhñ quia'a jootmä'adät, ni ja'a judíoshajxy, ni ja'a jäya'ayhajxy cajpä judíoshajpä, ni ja'a jäya'ayhajxy ja'a Diosmädia'agy mabøjpä. ³³ Jadúhñhøch høøchpä, hoy yajxónhøchä nyajtuñ nyaghity homiädyiibä nébiøchä jäya'ayhajxy jaduhñ xquiumáyät. Cábøch pøn jaduhñ nyagjootma'ady. Hix, chójpiøch njoot jaduhñ coo jäya'ayhajxy nägøxiä ñähwá'adsät ja'a piojpä ja'a quiädieeyhajxy. Cábøch njoot chocy cooçh nidiuhñ nbáadät ja'a hoybä ja'a weenbä.

11

¹ Nébiøchä Jesucristo nbahixiän, jadúhñhøch mi-jts xpiahíxpät.

² Hermanodøjc, xoondáacpøch jaduhñ cooçh mijts xjiahmiejtsta'agy homiänaajä, y coo Diosmädia'agy hajxy homiänaajä myajtuñ nebiátyhøch hajxy tøø nnajtscapxøøyyäm.

³ Chójpiøch njoot jaduhñ coo hajxy mwiinjuó'øwät coo Jesucristo ja'a Dios Wyiindsønhaty y coo højtsä Jesucristo nWiindsønhájtämbä, højts ya'adiøjc-hájtäm. Jaaná jaduhñä ndo'oxiøjc-hájtäm hajxy xwyiindsønhájtämbä, højts ya'adiøjc-hájtäm.

⁴ Maa hermanodøjc-hajxy yhamugø'øyän tsajtøgooty, coo ya'adiøjc jim tu'ug Dyiospa'yá'axät cuhjupmøød, cabä Jesucristo hamuumdu'joot wyiingudsähgø'øy; ni jaduhñ coo Diosmädia'agy cuhjupmøød yajwiinhixó'øwät.

⁵ Jaaná jaduhñduhmbä, coo to'oxiøjc-hajxy jiiby Dyiospa'yá'axät cuhwa'ads tsajtøgooty, o coo Diosmädia'agy hajxy jiiby yajwiinhixó'øwät cuhwa'ads, høchähdiuunnä hajxy je'eduhñ.

Jaduhñ je'eduhñ piaady nejpian yø'ø to'oxiøjc quiuhwaay hajxy yhøxme'xypän. ⁶ Jaduhñds je'e, pø cabä to'oxiøjc-hajxy tiägø'øwa'añ tsajtøgooty cuhjuuxy, ween hajxy jaduhñ ñä'ägä yajcuhme'xy. Y pø tsähdiuumb hajxy jaduhñ cuhme'xy, ween hajxy ñiguiuhjuuxyii. ⁷ Pero ja'a ya'adiøjc-hajxy, cab hajxy je'e ween tsajtøgooty cuhjupmøød tiägøøbiä. Hix, jaduhñä Dios ja'a ya'adiøjc yhädiuunñ nebiä Diosän. Ja'a ya'adiøjc-cøxpä jaduhñ quiähxø'øgy coo Dios mäjaa jiaanč tehñ miøødä. Pero ja'a to'oxiøjc-cøxpä quiähxø'øgy coo ya'adiøjc mäjaa miøødäbä. ⁸ Coo Dios ja'a to'oxiøjc jecy yhädiuunñ, jayøjpä ya'adiøjc ja'a quiaač tu'ug piøjcäxä. Mänitä to'oxiøjc yajwa'añguiøjä caačhaam. Jaduhñ jim myiñ cijaay maa Diosmädia'aguiän. Pero cab jaduhñ miäna'añ coo ya'adiøjc yajwa'añguiøjä ja'a to'oxiøjc quiaačhaam. ⁹ Ja'a ya'adiøjc-cøxpä ja'a to'oxiøjc yhädiuunäbä. Cab hajxy nmänäänämät coo ya'adiøjc yhädiuunä ja'a to'oxiøjc-cøxpä. ¹⁰ Páadiädsä to'oxiøjc-hajxy wiädität cuhjuuxy, jaduhñ hajxy yajcähxø'øgät coo hajxy yhane'emyii ya'adiøjcäm. Jaduhñä Diosmoonsähajxy quiumay, ja'a hajxy jim tsajpootypä. ¹¹ Pero jaduhñä Dios hajxy jecy xquiunúu'xäm ya'adio'oxy. ¹² Hix, jéquiänä to'oxiøjc yajwa'añguiøjä ja'a ya'adiøjc quiaačhaam. Jaanä jaduhñduhmbä, ja'a to'oxiøjc-cøxpä ja'a ya'adiøjc myiñguia'ay.

¹³ Huuc mäna'an mijts pø hawiinmats jaduhñ coo to'oxiøjc-hajxy cuhwa'ads Dyiospa'yá'axät tsajtøgooty. ¹⁴ Hočhädiuunñä jaduhñ coo ya'adiøjc

quihwaayhajxy yoñ yajyéegät. Hoy piönä jaduhñ miäna'añ. ¹⁵ Pero hahixøøyyäp ja'a to'oxiøjc-hajxy jaduhñ coo quihwaay hajxy yajyéegät yoñ; jaduhñ je'eduhñ miäbaady nebiä cuhmochpän. ¹⁶ Jaduhñ hõjts nnä'ägädä yajñähixø'øy coo to'oxiøjc-hajxy cuhmoch Dyiospa'yá'axät tsajtøgooty. Y jaduhñä hermanohajxy nägøxiä yajñähixøøbiä tsajtøgooty wiinduhmyhagajpt. Hoorä, pønjaty jaduhñ mänaamb cooc tyijy jaduhñ quia'a nejpiä coo to'oxiøjc-hajxy jaguiuhmoch tsajtøgooty Dyiospa'yá'axät, cabä tøyhajt hajxy ñä'ägädä møødä.

¹⁷⁻¹⁹ Tøøch nmädoyhaty coo hajxy näje'e haxøøgtøjiämuum mniñäma'ayii maa hajxy tsajtøgooty mhamugø'øyän. Tøyhajtäda'a jaduhñ. Cab jaduhñ yhooyä y cábøch jaduhñ ngumay, hóyhøch jaduhñ nja najuø'øy coo jäya'ayhajxy yhixa'añ pønjaty tøyhajt hoy wädijp. ²⁰ Coo Jesucristo hänäjty yagho'oga'añii, mänitä jiamiøød ñämaayy coo hajxy chuugaamiügät ja'a Jesucristocøxpä. Pero mijts, coo hajxy naxy tsajtøgooty mhamugø'øy, coo hajxy naxy mdsuugaamiucy, cabä Jesucristo hajxy naxy mjahmiech. ²¹ Hanidiuhmjaty hajxy naxy mgay. Cab hajxy naxy mdajy mmay pø jii mmägu'ughajpä caayyøøc hajxy miøødä quia'a møødä. Näje'e hajxy naxy mmu'ugyii. ²² Jim hajxy hawiinmats mgay mhú'ugät maa mhamdsoo tøjc-hajxiän. Cab jaduhñ yhooyä coo hajxy jaduhñ mjatcø'øy maa Diostøjcän. Myajtsähdiuumbiä häyoobäya'ay hajxy jaduhñ. Cáboch mijts jaduhñ nnä'ägädä cumay coo hajxy jaduhñ mjatcø'øy.

23 Hamdsoochä Jesucristo xyajnáhixøøyy nébiøch mijts tøø nnajtscapxøøyyäm: Hoorä, mänittsuu, coo Jesucristo hánajty tiooga'añii, mänitä Jesucristohajxy tiägøøyy tsuugaabiä møødä jiamiøødhajxy. Mänitä Jesucristo tsajcaagy quionø'cy. 24 Mänit Dioscujú'uyäp yejcy. Mänitä tsajcaagy yhaguidøøyy. Mänit miänaañ: "Huuc cay hajxy. Høøch nni'x høøch ngopc hädaa. Mijtsçøxpøchä häna'c xtiooga'añ. Cooch mijts mänaa xjiahmiejtstá'agät, jaduhñä tsajcaagy hajxy mgáyät." 25 Y coo hajxy hánajty tøø chuugaabiädøøñä, mänitä Jesús vino quionø'cy copajooty. Mänit miänáangombä: "Cooch mijts nnähho'tu'udaañä, cooch nnø'ty nyaghäyowaañä, hawiinjemybiä Dios hajxy xmiøødyajcuhduga'añ. Hoorä, hädaa vino, hijxtahñd jaduhñ miähmø'øwa'añ nébiøch nnø'tiän. Y naaghooc hädaa vino hajxy mhu'ugy, mänitøch hajxy xjiahmiejtstá'agät." 26 Homiänaajä hädaa tsajcaagy hajxy hánajty mgaya'añ, homiänaajä hädaa vino hajxy hánajty mhu'uga'añ, myajcøhxø'py hajxy hánajty coo Jesucristo hajxy tøø xñähho'túutäm. Hix, wiimbijtagatsaambä Jesucristo. Yaa jadähooc quiädaactägatsa'añ hädaa yaabä naaxwiin.

27 Nebiä Jesucristo jiamiøødhajxy miøødcaayy miøødhuuquiän, jaduhñäc hajxy ngaayy, jaduhñäc hajxy nhúucämbät. Pønjetiä howyiinmahñdy hánajty ca'a møød coo hánajty jaduhñ quiaya'añ, coo hánajty jaduhñ yhu'uga'añ, haxøøg hajxy jaduhñ jiatcø'øy ja'a Jesucristo ñi'xcøxpä ñø'tycøxpä. 28 Jaduhñds je'e, coo hajxy

hänajty mgaya'añ ja'a Jesucristocøxpä, coo hajxy hänajty mhu'uga'añ ja'a Jesucristocøxpä, naxy hajxy jayøjpiä mdehm ñiñajuø'øwøjät pø howyiinmahñdy hajxy hänajty mjaanč møød. ²⁹ Pønjaty jaduñ caaby huucp ja'a Jesucristocøxpä, coo hajxy jaduñ quia'a møjpadá'agät coo Jesucristo hajxy xñähho'túutäm, yajcumädowáanäp hajxy jaduñ. ³⁰ Näje'e hajxy mba'ambety; näje'e hajxy mga'a majaamøødä. Høxtä näje'ejaty hajxy jaduñ tøø yho'ogy. Paady hajxy jaduñ mjaty mhabety coo hajxy mga'a møjpada'agy coo Jesucristo hajxy tøø xñähho'túutäm. ³¹ Pero cabä Dios hajxy xyajcumädóowämät coo howyiinmahñdy hajxy hänajty nmøødhájtäm coo hajxy hänajty ngayáañäm ja'a Jesucristocøxpä, coo hajxy hänajty nhu'ugáañäm ja'a Jesucristocøxpä. ³² Paadiä Dios hajxy tähoogaty xyajcumädóowäm, jaduñ hajxy xyajnajuøøyyäm coo miädia'agy hajxy hänajty hoy nga'a yajtúunäm. Y coo miädia'agy hajxy hoy nyajtúunämät, cab hajxy jiiby nnä'ä hädáacämät møjcu'uhaam maa jäya'ayhajxy yhäda'aga'añän, ja'a hajxy ca'a mäbøjpä.

³³ Jaduhñds je'e, hermanodøjc, coo hajxy hänajty mänaa mgaamiuga'añ ja'a Jesucristocøxpä, coo hajxy hänajty mänaa mhuucmuga'añ ja'a Jesucristocøxpä, naxy hajxy tu'cuhtuñ mdehm quiaaächóonät. Mniyhahixø'øwøjöp hajxy jaduñ. ³⁴ Pø myähó'cäp hajxy hänajty, jayøjp hajxy mnä'ägä cáyät maa mdøjc-hajxiän. Jaduhñä Dios hajxy xquia'a yajcumädóowät coo hajxy hänajty mgaamiuga'añ ja'a Jesucristocøxpä, coo hajxy

hänajty mhuucmuga'añ ja'a Jesucristocøxpä. Madiu'uçh hajxy tøø xjiaac mäyajtøy. Cooçh jim nnøcxät maa mijtsän, mänitøch jim nyajtødiägø'øwät.

12

¹ Hermanodøjc, tsøg hajxy mädiáacäm nebiatiä Dioshespíritu hajxy xpiuhbéjtäm, coo hawiingatiä tuuḅg hajxy xmióoyäm. Naxy hajxy jaduḅḅ mdehmḅ wyiinjuó'øwät.

² Mnajuøøby hajxy jaduḅḅ, coo Diosmädia'agy hajxy hänajty mga'a panøcxyñä, je'enä quepychech naaxpoch hajxy hänajty mwiingudsähgø'øyñä. Cabä quepychech naaxpoch quiapxy miädia'agy. Jaduḅḅ hajxy hänajty mwädity nebiä tu'udägoybän. ³ Huuc wiinjuó'øw hädaa mädia'agy hajxy. Pønjetiä Dioshespíritu jaduḅḅ najtscapxøøyyäp, cabä Jesús hajxy je'e haxøøg ñänømy. Y pønjetiä Dioshespíritu jaduḅḅ ca'a najtscapxøøyyäp, cab hajxy hoy miäna'ana'añ coo Jesús hajxy nWiindsønḅhájätäm.

⁴ Coo Diostuuḅg hajxy jaduḅḅ ndúunäm, hawiingatiä Diostuuḅg hajxy jaduḅḅ xpiáatäm. Pero ja'a Dios ja'a yhEspírituhajtiä hajxy jaduḅḅ xtiuuḅgmóoyäm. ⁵ Madiu'u ja'a Diostuuḅg hajxy jaduḅḅ njaançh túunäm, pero tu'jäya'ayyá hajxy jaduḅḅ nWiindsønḅhájätäm. Ja'a Jesucristo je'e. ⁶ Ja'a Dios hajxy xpiuhbéjtäm coo tiuuḅg hajxy ndúunämät, nebiatiä tiuuḅg hajxy xpiáatäm. ⁷ Paadiä Dioshespíritu hajxy hawiingaty xtiuuḅgmóoyäm, jaduḅḅ hajxy hoy nnibiuhbéjtämät hamiñ haxøpy. ⁸ Hix,

näje'e hermanohajxy tiuuḅgmo'oyii ja'a

Dioshespíritäm coo hajxy quiapx coo hajxy miädiá'agät nebiä jajpä häna'cän. ⁹ Näje'e hermanohajxy piuhbedyii ja'a Dioshespíritäm coo hajxy hoy jiaanč tehṃ miäböğät ja'a Diosmädia'agy. Näje'e hajxy miäjaamo'oyii nebiä jäya'ay hajxy yajmøcpøğät, ja'a pøjc ja'a híjxäbä. ¹⁰ Näje'e hermanohajxy piuhbedyii ja'a Dioshespíritäm coo hajxy hoy-yagjuøñä tiuñ ja'a Diosmäjaagøxpä. Näje'e hajxy tiuunḡmo'oyii coo Diosmädia'agy hajxy yajwá'xät. Näje'e hajxy tiuunḡmóoyyäbä coo hajxy yhøxcábät pøn najtscapxøyyäp ja'a Dioshespíritäm, pøn najtscapxøyyäp ja'a møjcu'ugóngäm. Näje'e hajxy piaadyii coo hajxy quiápät wiinghayuucjaty. Näje'e hajxy piátäbä coo hajxy quiapxhoyø'øwät waambatiä hermanohajxy tøø quiapxy wiinghayuucjaty. ¹¹ Hanidihmjatiä Dioshespíritu hajxy xtiuunḡmóoyyäm, nebiä jioot chocy. Tu'uquiiä ja'a Dioshespíritu jaduñ.

¹² Ja'a tu'ugpä ni'x, ja'a tu'ugpä copc, madiu'u pajc miøødä. Pero tu'ugpä ni'x tu'ugpä copc hajxy jaduñ nmøødhájtäm. Jaduhñ mäwiin højtshájtäm, tu'ugmädia'agy hajxy nhájtäm coo Jesucristo hajxy nWiindsønhájtäm, hoy hajxy nja nämayhájtäm. ¹³ Coo hajxy nnäbéjtäm, jaduñä Dioshespíritu hajxy xpiädáacäm tu'ugmädia'agy nägøxiä, møødä judíoshajxy, møødä cajpä judíoshajxy, møødä jäya'ayhajxy je'ehájtäbä wiinghänä'cäm, møødä jäya'ayhajxy hijpä hawa'adstuum. Nägøxiä ja'a Dioshespíritu hajxy nmøødhájtäm.

¹⁴ Ja'a tu'ugpä ni'x ja'a tu'ugpä copc, madiu'u pajc hajxy nmøødhájtäm. ¹⁵ Coods yø'ø tecy

jaduhñ ñä'ä mäná'anät: “Cábøch tii nmach cábøch tii nnähdoñ nej yø'ø cø'øjän, páadyhøch miich jaduhñ xquia'a yajtuna'añ”, cab jaduhñ ñä'ä tøyäbä; haa ca'a, nyajyohy nyajnájxäm ja'a tecy jaduhmbä. ¹⁶ Jaanä jaduhnduhmbä, coo yø'ø taatsc jaduhñ miänáambät: “Cábøch jaduhñ nhixy nej yø'ø wiinän, páadyhøch miich jaduhñ xquia'a yajtuna'añ”, cab jaduhñ ñä'ä tøyäbä; haa ca'a, nyajmädóowäm ja'a taatsc jaduhmbä. ¹⁷ Coo hajxy häxøpy nhaagä wiinhájtäm, cab hajxy häxøpy nmädóowäm. Y coo hajxy häxøpy nhaagä mädohndhájtäm, cab hajxy häxøpy tii xjiøjxuugóoyyäm. ¹⁸ Jaduhñä Dios hajxy xquiunúu'xäm nebiaty hajxy xyajmädsójcäm. Paadiä ni'x ja'a copc hajxy nmøødhájtäm, paadiä cø'ø ja'a tecy hajxy nmøødhájtäm. ¹⁹ Coo hajxy häxøpy nhaagä pajc-hájtäm, cabä nni'x ja'a ngopc-hajxy häxøpy yhíjtäm. ²⁰ Madiu'u ja'a pajc hajxy nmøødhájtäm ja'a tu'ugpä jäya'ay. Tu'ugni'x tu'ugcopc hajxy jaduhñ nmøødhájtäm.

²¹ Coo wiin häxøpy quiapxy, cabä cø'ø jaduhñ ñämä'awät: “Cábøch miich nyajmaajiaty.” Jaanä jaduhñä copcpä, coo häxøpy quiapxy, cabä tecy jaduhñ ñämäabiät: “Cábøch miich nyajmaajiaty.” ²² Pero nhaagä yajtuuñgpáatäm ja'a ni'x ja'a copc cøxiä, hoyyä pajc näje'e quia'a jagä møcä. ²³ Cabä ni'x ja'a copc hajxy teeñmuum nyajcähxø'ogáanäm, paadiä wit hajxy nmøødhájtäm. ²⁴ Pero ja'a nwiin ja'a njøjphájtämhajxy, cab jaduhñ ñejpiä coo hajxy nyajcähxø'cämät. Jaduhñhøch cham tøø nmädia'agy nebiä Dios ja'a nni'x ja'a ngopc-hájtämhajxy xquiunúu'xäm tu'ughamuum.

Hoorä, jaduñ mäwiin højtshájtäm, tu'ugmädia'agy hajxy nnimiødhájtäm coo Diosmädia'agy hajxy näguipxy nmäbøjcäm, coo Jesucristo hajxy näguipxy nWiindsøñhájtäm. Jaduñä Dios hajxy xquiunúu'xäm coo hermanodøjc hajxy nwiingudsähgøøyyämät, hoy hajxy jia xoñ jia häyoy. ²⁵ Jaduñä Dios quiumay coo hajxy nhájtämät tu'ugjoot tu'ugcopc, coo hajxy nniçhojc coo hajxy nnimié'e'xämät hamiñ haxøpy. ²⁶ Coo tu'jäya'ay chaachpøgät, mänit hajxy nägøxiä njootmayhájtämät. Jaanä jaduñduhmbä, coo tu'jäya'ay wyiingudsähgø'øwøøjät, mänit hajxy nägøxiä nxoondáacämät.

²⁷ Nwiindsøñhájtämä Jesucristo hajxy nägøxiä pønjetiä Diosmädia'agy mäbøjp. Hawiingatiä Dios hajxy tøø xquiunúu'xäm. ²⁸ Näje'e hermanohajxy tøø tiuungmo'oyii ja'a Diósäm. Ja'a Dios quiuguexyhájtäbä, je'e hajxy jayøjp tuungpaat. Mänit hajxy je'e tiuungpaatpä, ja'a Diosmädia'agy-yajwa'xpähajxy, møødä Diosmädia'agy-yajwiinhixøøbiähajxy. Näje'e hermanohajxy hoy-yagjuøøñä tiuñ ja'a Diosmäjaagøxpä. Näje'e hermanohajxy yajmøcpøcy ja'a jäya'ayhajxy nähba'amguhba'ambä. Näje'e hermanohajxy miäbuhbety. Näje'e hajxy jaduñ miägapxy yhane'emy. Näje'e hajxy piaadyii coo wiinghayuucjaty hajxy quiápxät. ²⁹ Hoorä, cabä Dios hajxy nägøxiä xquiuguexyhájtäm. Cabä Diosmädia'agy hajxy nägøxiä nyajwá'xäm. Cab hajxy nägøxiä nyajnahixøøyyäm. Cab hajxy nägøxiä ndúunäm hoy-yagjuøøñä ja'a Diosmäjaagøxpä. ³⁰ Cab hajxy

nägøxiä nba'amyajnáxäm. Cab hajxy nägøxiä tøø xpiáatäm coo ngápãmät wiinghayuucjaty. Y cab hajxy nägøxiä tøø xpiáatäm coo hajxy ngapxhoyøøyyämät waambatiä hermano tøø quiapxy wiinghayuucjaty. ³¹ Tsøgä njoot hajxy pädáacäm hamuumdu'joot coo Dios tuung hajxy ween xmióoyäm ja'a maas tsoobaatpä. Chámhøchá mädia'agy hajxy nyajnáhixø'øwa'añ nebiä Dios miädia'agy hajxy hoy mmaas yajtu'uyó'oyät.

13

¹ Coo nmädøjc hajxy nga'a tsojc nga'a méé'xämät, cabä Diosmädia'agy hajxy hñajty hoy ngudiúunäm, hoy hajxy cu nja capx cu nja mädiáacäm madiu'u nebiä jäya'ayhajxy yaa jia capxiän hädaa yaabä naaxwiin, nebiä Diosmoonsähajxy jim jia capxiän tsajpootyp. ² Coo nmädøjc hajxy nga'a tsojc nga'a méé'xämät, cab hajxy nnä'ägädä tsoobáatämät, hoy hajxy cu nja najuøøyyäm tii jadaánäp tii tunáanäp, hoy hajxy cøxiä wiinä cu nja najuøøyy cu nja jahmiéjtsäm, hoyyä møcmäjaa hajxy cu nja jaançh tehñ miøødhájtäm hoy ñä'ä tiigøxpä. ³ Coo nmädøjc hajxy nga'a tsojc nga'a méé'xämät, cab hajxy nnä'ägädä tsoobáatämät, hoyyä häyoobäjäya'ay hajxy cøxiä wiinä cu nja móoyäm mäduhñtiä hajxy nmøødhájtäm, hoyyä jäya'ay hajxy cu nja nähho'túutäm.

⁴ Pøñä miädøjc tsojp mee'xp, mee'xxieemy hajxy jaduhñ yhity. Hoy hajxy jaduhñ miädøjc-haty. Cabä hadsocwyiinmahñdy hajxy miøødá. Cab hajxy yajcumaya'añ. ⁵ Pøñä miädøjc tsojp

mee'xp, cab hajxy chähdiuhndägoyyä. Cab hajxy wyiinducä. Cab hajxy jiootma'ady, hoy hajxy cøxypänejpiä cu jia tunøø. ⁶ Cabä haxøøgpä hajxy chocy; ja'a tøyhajtpä hajxy jaduñ chojpy. ⁷ Pønä miädøjc tsojp mee'xp, miee'xtujpy hajxy. Coö hajxy cøxypänejpiä tiunøøjät ja'a miädøjcäm, cab hajxy jiootma'ady. Cab hajxy ñäxø'owø'øy, cab hajxy ñähøønø'øy. Hoy hajxy miäxi'igy, hoy hajxy miägaxy, weenä craa ja'a tøø quiädiéeyäbä jaduñ yhuuc wiinmahñmech coö jaduñ tøø quiädieey.

⁸ Habaadaamb jaduñ coö jäya'ayä Diosmädia'agy hajxy hänajty quia'a yajwa'xaannä. Habaadaamb jaduñ coö jäya'ayhajxy hänajty quia'a capx quia'a mädia'agaannä wiinghayuucjaty. Habaadaamb jaduñ coö quia'a tsoobaadaannä tijatiä jäya'ayhajxy yaa ñajuøøby hädaa yaabä naaxwiin. Pero cøjxta'axiøø hajxy nniçhoc nnimiee'xäänäm. ⁹ Cahnä hajxy hoy nwiinjuøøyyäm je'eguiøxpä coö hajxy yaa nhjätännä hädaa yaabä naaxwiin. Cahnä Diosmädia'agy hajxy hoy nhabøjcäm coö hajxy nyajwá'xämät. ¹⁰ Habaadaamb jaduñ coö Diosmädia'agy hajxy maas ca'xy nwiinjuø'owáänäm, paady hänajty pøn quia'a wäditaannä Diosmädia'agy-yajwa'xpä.

¹¹ Coö hajxy nmuutsc-hjätännä, cahnä hajxy hänajty nwiinmahñméjtsäm. Pero coö hajxy nmøjjøøyyänä, mänit hajxy nnajuøøyyänä. Tøø hajxy nwiinmahñméjtsänä; cab hajxy nwiinmahñdyhjtänä neby hajxy tøø nmuutsc-hjätäm. ¹² Jaduñ mäwíinäts je'e, coö hajxy yaa nhjätäm hädaa yaabä naaxwiin, cahnä

Diosmädia'agy hajxy hoy nwiinjuøøyyämna. Cahnä Dios hajxy nhixyhájtäm. Pero coo hajxy jim nnøcxáanäm tsajpootyp, mänitä Dios hajxy nhixyhadáanäm neby hajxy je'e xyhixyhájtäm. Mänitä miädia'agy hajxy ca'xy nwiinjuø'øwáanäm. ¹³ Tägøøgtu'u ja'a Dios hajxy xyhanémäm; coo miädia'agy hajxy nmäbøjcämät coo tiøyhajtä, chaads coo Jesucristo hajxy njøbhíxämät coo yaa quiädaactägatsa'añ, chaads coo nmädøjc hajxy ndsojc nmée'xämät. Hädaa høxhaambä jaduhñ maas tsoobaadaamb coo nmädøjc hajxy ndsojc nmée'xämät.

14

¹ Naxy hajxy ndehm ñiçojc ndehm ñimiée'xämät hoy miänaajä. Je'e maas tsoobaatp. Jaanä jaduhñduhmbä, tsøgä Dios hajxy nämáayyäm coo mäjaa hajxy ween xmióoyyäm coo tiuung hajxy jaduhñ nduunämät. Je'e tsoobaatp coo hermano ja'a Diosmädia'agy hajxy yajwa'xy. ² Näje'e hermanohajxy, coo hajxy hñajty quiapxa'añ tsajtøgooty, cab hajxy howyiinjuøøñä miädia'agy. Hix, ja'a Dios hajxy jaduhñ miøødmädiaacy, ca'a yhøjtshájtäm, je'eguiøxpä coo Dioshajtä wyiinjuø'øy. Cab højts jaduhñ nnä'ägädä wiinjuøøyyäm. Najtsapxøøyyäp hajxy jaduhñ ja'a Dioshèspiritäm. Jagooyyä Dios jaduhñ ñajuø'øy waambaty hajxy jaduhñ miädia'agy. ³ Pero coo Diosmädia'agy hajxy ngápxämät nebiä jäya'ayhajxy jaduhñ wyiinjuø'øwät, mänitä jäya'ay ja'a Diosmädia'agy hajxy hoy nyajwiingapxøøyyämät, hoy hajxy jaduhñ nmägäp x nhané'emät, hoy hajxy jaduhñ

ngapxmøcpøjcämät. ⁴ Pøñ Dioshajtiä nä'ä møødmädiacp, je'e mäjaa nidiuhm móoyyöp nebiä Diosmädia'agy maas hoy jiaac wiinjuó'owät. Hix, cabä jäya'ayhajxy jaduhñ wyiinjuó'øy waambaty jaduhñ miädia'agy. Pero coo hermanodøjc ja'a Diosmädia'agy hajxy nyajwiingapxøøyyämät howyiinjuøøñä, mänit hajxy miäjaamo'owøøjät nebiä Diosmädia'agy hajxy jaduhñ maas hoy jiaac wiinjuó'owät.

⁵ Maas tsoobaatp jaduhñ coo Diosmädia'agy hajxy ngápxämät howyiinjuøøñä; jaduhñä hermanohajxy nägøxiä wyiinjuó'owät, ja'a hajxy mädoobä. Hoy hit jaduhñ coo Dioshajtiä hajxy nägøxiä mmøødmädiá'agät. Mänit mæbøcy yhoyó'owät coo hajxy mgapxhoyó'owät, jaduhñä hermanohajxy nägøxiä wyiinjuó'owät.

⁶ Hermanodøjc, coochä Dioshajtiä nnä'ä møødmädiá'agät maa mijtsän, cab hajxy jaduhñ hoy mwiinjuó'owät. Pero mänit hajxy jaduhñ mwiinjuó'owät cooch mijtsä Diosmädia'agy hoy nyajwiinhixó'owät nebiátyhøchä Dios ja'a miädia'agy hänajty xñajtsapxøøyyä.

⁷ Høxtáhmädsä xuuxpädøjc-hajxy, coo hajxy hoy quia'a xú'uxät, nägoodä hajxy nøcxy ñä'ä yajxu'uxy ñä'ä yajpøgø'øy, y cab hoy yajmädoy. ⁸ Jaaná jaduhñduhmbä maa jäya'ayhajxy chiptuñän, coo soldado ja'a corneta hoy quia'a yajxú'uxät, cabä jiamiøødhajxy jaduhñ hoy chiptúnät. Nä'ä himybiäyø'øg nø'ø maamybiäyø'ögäp hajxy jaduhñ. ⁹ Jaduhñ mäwíinäts højtshájtäm, coo Dioshajtiä hajxy nmøødmädiáacämät, cabä

nmädia'agy hajxy jaduhñ nniwyiinjuóøyyämät hamiñ haxøpy. Xiøøbä hajxy jaduhñ nnä'ä capx nnä'ä mädiáacämät. ¹⁰ Madiu'u hayuuc hajxy yaa ngápxäm hádaa yaabä naaxwiin. Hawiingaty hayuuc hajxy nniwyiinjuóøyyäm. ¹¹ Y coo mädia'agy hajxy hamiñ haxøpy nga'a nniwyiinjuóøyyämät hawiingjaty, cab hajxy jaduhñ hoy nnimiøødmädiáacämät. ¹² Jaduhñ mäwíinäts mijts, mjaançh tehñ miánaamb mijts jaduhñ coo Dioshespíritu hajxy xtiuungmó'owät. Y myujwá'anäp ja'a tuunç hajxy mädyii maas tsoobaatp. Jaduhñä hermanodøjc hajxy maas hoy myajwiingapxø'owät nebiä Diosmädia'agy hajxy jaduhñ maas hoy wyiinjuó'owät.

¹³ Jaduhñds je'e, pøñ jaduhñ howyiinjuøøñä ca'a capxp ca'a mädiaacp, weenä Dios jaduhñ ñäma'ay coo miäjaamo'owøøjät nebiä miädia'agy quiapxhoyø'owät. ¹⁴ Coo Dios hajxy nba'yáaxämät ja'a hayuuc-haamby mädyii Dioshajtiä wyiinjuøøbiä, cab hajxy nwiinjuøøyyämät, hoy hajxy cu nja mädiáacäm wiinmahñdyhaam. Y cab hajxy jaduhñ nnä'ägädä wiinjuøøyyäm. ¹⁵ Jaduhñds je'e, tsøcxä Dios hajxy pa'yáaxäm juøhñdyhaam, pero howyiinjuøøñä. Tsøcxä Dioshøy hajxy høøwäm juøhñdyhaam, pero howyiinjuøøñä. ¹⁶ Coo Dios hajxy nnämäáyyämät “Dioscujú'uyäp”, ja'a hayuuc-haamby mädyii Dioshajtiä wyiinjuøøby, cab hajxy hamdsoo nwiinjuøøyyämät. Y ja'a jäya'ayhajxy jii mädoobä, ni je'e hajxy jaduhñ quia'a wiinjuó'owät. Y cab hajxy hoy piamáná'anät “Dioscujú'uyäp.” ¹⁷ Hoyyä Dios hajxy yajxon

cu nja nämáayyäm “Dioscujú'uyäp”, ja'a jäya'ayhajxy jii mädoobä, cab hajxy wyiinjuó'øwät. Y cabä Diosmädia'agy hajxy jaduñ jiaac wiinjuó'øwät. ¹⁸ Høøch, nnämäabiøchä Dios “Dioscujú'uyäp” je'eguiøxpä cooçh pøn jaduñ xquia'a najtspaadø'øy nébiøch hayuuc-haamby ngapxiän, ja'a Dioshajtiä wyiinjuøøbiä. ¹⁹ Pero maa hajxy nhamugøøyyämän tsajtøgooty Dioswiingudsähgøøbiä, tsoobaatp jaduñ cooçh howyiinjuøøñä ngápxät, hoy jia weeñtiä. Cab jaduñ jiaty tsoobáadät cooçh hayuuc-haamby ngápxät ja'a Dioshajtiä wyiinjuøøbiä, hóyhøch yoñ cu nja capx. Hix, cooçh howyiinjuøøñä ngápxät, wyiinjuó'øwäp ja'a hermanohajxy jaduñ, jadúhñhøchä Diosmädia'agy hajxy hoy nyajwiingapxó'øwät.

²⁰ Hermanodøjc, tsøg hädaa mädia'agy hajxy hoy wiinjuøøyyäm nebiä møjhänä'c-hajxy hoy wyiinjuø'øyän. Yø'ø pigäna'c-hajxy, cahnä hajxy wyiinmahñmechñä. Pero cahnä haxøøgpä hajxy yhixy yhabaadyñä. ²¹ Jaduhñä Diosmädia'agy jecy miänaañ: “Ja'a judíoshajxy, cábøchä nmädia'agy hajxy xmiäbøgaanä. Nguexáambiøchä jäguembä jäya'ay jim maa judíoshajxiän. Mänit hajxy miøødmädia'aga'añii wiinghayuuc-haamby. Pero ni jadúhñhøchä nmädia'agy hajxy xquia'a mäbøgaanä, nømä Dios miäna'añ.” ²² Ja'a jäya'ay ja'a Diosmädia'agy hajxy ca'a mäbøjpä, je'eguiøxpä højts hayuuc-haamby ngápxäm, ja'a Dioshajtiä wyiinjuøøbiä, ca'a jie'eguiøxpä ja'a jäya'ayhajxy ja'a Diosmädia'agy mäbøjpä. Coo hajxy naxy ngápxäm ja'a hayuuc-haamby

mädyii Dioshajtiä wyiinjuøby, jaduhnä Dios hijxtahnd xii yecy coo jäya'ay tsaachpä peenä hajxy piaada'añ, ja'a Diosmädia'agy hajxy ca'a mabøjpä. Pero coo Diosmädia'agy hajxy naxy ngápxäm howyiinjuøñä, jaduhnä Dios hijxtahnd xii yecy coo jäya'ay hoybä weenbä hajxy piaada'añ, ja'a Diosmädia'agy hajxy mabøjpä. ²³ Hix, coo hajxy nägøxiä ngápxämät ja'a hayuuc-haamby mädyii Dioshajtiä wyiinjuøby maa hajxy hánajty nhamugóøyyämän tsajtøgooty Dioswiingudsähgøøbiä, y coo jäya'ayhajxy jim tiägó'owät, ja'a Diosmädia'agy hajxy ca'a mabøjpä, jaduhnda'a hajxy miáná'anät cooc tyijy hajxy nguhhíñäm. ²⁴⁻²⁵ Pero coo Diosmädia'agy hajxy nägøxiä ngápxämät howyiinjuøñä, mänitä jäya'ayhajxy wyiinjuó'owät, ja'a hajxy ca'a mabøjpä. Mänit hajxy yhuuc tehñ wyiinmahñmédsät. Mänit hajxy hamdsooyä ñiñajuø'owøøjat coo hajxy hánajty hoy tøø quia'a jäya'ayhaty. Mänit hajxy jaduhñ jyijcädá'agät. Mänitä Dios hajxy yhuuc tehñ wyiingudsähgó'owät. Mänit hajxy yhuuc tehñ miáná'anät coo Dios hajxy hánajty tøy xjiaançh tehñ miøødhítäm.

²⁶ Hermanodøjc, maa hajxy nhamugóøyyämän tsajtøgooty Dioswiingudsähgøøbiä, tsøg hajxy yajxón yagjáltäm nägøxiä, jaduhnä Diosmädia'agy hajxy maas hoy nmaas mabøjcämät. Näje'e Dioshøy hajxy yhøwa'añ. Näje'e hajxy yajnáhixø'owa'añ. Näje'e hajxy miädia'aga'añ waambatiä Diosmädia'agy hajxy hánajty tøø ñajtsapxø'øyii ja'a Diósäm. Näje'e hermanohajxy

quiapxa'añ hayuuc-haamby mädyii Dioshajtiä wyiinjuøøby. Y näje'e hermanohajxy quiapx-hoyø'øwa'añ waambatiä hermanohajxy hänajty tøø quiapxy ja'a hayuuc-haamby ja'a Dioshajtiä wyiinjuøøbiä. ²⁷ Coø hajxy mänaa ngápxämät ja'a hayuuc-haamby ja'a Dioshajtiä wyiinjuøøbiä maa hajxy hänajty nhamugóøyyämän tsajtøgooty Dioswiingudsähgøøbiä, nämetsyä nädägøøquiä hajxy ngápxämät hanidiuhmjaty. Mänitä hermano tu'jäya'ay xquiapxhoyóøyyämät. ²⁸ Pero pø cabä hermanohajxy jim näje'e jiaty capxhoyø'øw, mejor ween hajxy jim nga'a nä'ägädä cápxämät tsajtøgooty ja'a hayuuc-haamby mädyii Dioshajtiä wyiinjuøøby. Wiingtuum hajxy nøcxy nnä'ägädä cápxäm jaduhñ hanidiuhmjaty. Xmiädóowämäp ja'a Dios hajxy jaduhñ. ²⁹ Jaanä jaduhñduhmbä, coø hermanohajxy hänajty quiapxa'añ waambaty hajxy hänajty ñajtsapxø'øyii ja'a Diósäm, ween hajxy nämetsyä nädägøøquiä quiapxy. Y ja'a hermanohajxy jaac jiiä, mänit hajxy jaduhñ miäná'anät pø tøø hajxy hoy miädoy, pø caj. ³⁰ Y coø wiinghermano hänajty quiapxa'añ waambaty hänajty ñajtsapxø'øyii ja'a Diósäm, weenä hermano yhuuc hamoñ, ja'a hänajty capxpä. ³¹ Hanidiuhmjaty hajxy ngápxämät nägøxiä waambatiä Dios hajxy hänajty xñajtsapxøøyyäm. Jaduhñ hajxy nägøxiä maas hoy nhabójcämät; jaduhñ hajxy nägøxiä nniguiapxwíjjämät. ³² Hix, coø miiçh hänajty mgapxa'añ waambaty miiçhä Dios hänajty xñajtsapxø'øwaanä, mänit mgápxät coø hänajty tøø xyhabaatä. ³³⁻³⁴ Jaduhñä Dios

quiumay coo hajxy haniduhmjaty ngápxámät. Cab jaduñ quiumay coo hajxy nägøxiä nxiicmujc nmädiaacmújcämät tsajtøgooty.

Cab jaduñ yhoyyä coo to'oxiøjc-hajxy jii by quiápxät tsajtøgooty maa Dios hajxy hánajty nwiingudsáhøøyyámän. Cabä Dios jaduñ miäna'añ coo hajxy jii by quiápxät. Jaduñä hermanohajxy nägøxiä quihdujthaty wiinduhmyhagajpt. Jaduñä Diosmädia'agy miäna'añ coo to'oxiøjc-hajxy miädia'agymiäbøgät. ³⁵ Hoçhähdiiunnä jaduñ coo to'oxiøjc-hajxy jii by quiápxät tsajtøgooty. Pø cabä Diosmädia'agy hajxy hánajty tøø wyiinjuø'øy tsajtøgooty, jimä ñihyhap hajxy miäyajtøwät maa yhamdsoo tøgootyhajxiän.

³⁶ Jaduñä hermanodøjc-hajxy nägøxiä miäna'añ wiinduhmyhagajpt coo to'oxiøjc-hajxy jii by quia'a capx quia'a mädiá'agät tsajtøgooty nebiä Diosmädia'agy miäna'añ. Y mijts jim hijpä Corintos, jaduñ mijts mbaguhdujthájpät. Caj mijts mhamdsoo cuhdujt myajtúnät. ³⁷ Nébiøch cham ngujaay, Diosmädia'agy hädaaduhñ. Naxy hajxy jaduñ mdehm miäbøgät, pøn jaty jaduñ niñänøømäp coo Dios hajxy ñajtsapxøøyyäxä, coo Dioshespíritu piuhbedyii. ³⁸ Pøn jaty hajxy jaduñ ca'a mäbøgaamb, cabä Dios hajxy jaduñ quiumaya'añii.

³⁹ Jaduñds je'e, hermanodøjc, tsøgä Dios hajxy nämáayyäm coo hajxy tehngajnä ween xpíuhbéjtämät, coo miädia'agy hajxy xñajtsapxøøyyämät. Jaduñä miädia'agy hajxy hoy nyajwá'xämät. Pøn jaduñ capxaamb mädia'agaamb ja'a hayuuc-haamby ja'a Dioshajtiä

wyiinjuøøbiä, ween hajxy jaduhñ quiapxy, ween hajxy jaduhñ miädia'agy. ⁴⁰ Pero tsøgä Diosmädia'agy hajxy hoy yajxón yagjåjtäm tsajtøgooty.

15

¹⁻² Hermanodøjc, tsøg hajxy jahmiejtstáacäm coo Jesucristo hajxy tøø xñähho'túutäm. Jadúhñhöch mijts tøø nyajwiingapxø'øy. Tøø hajxy jaduhñ nmäbøjcäm. Coo hajxy tehñgajnä nmäbøjcämät hamuumdu'joot, mänit hajxy jimñ nnøcxämät Dioswiinduum. Pero coo hajxy jaduhñ nga'a mäbøjcämät, cab hajxy jimñ nnä'ägädä nøcxämät.

³ Jadúhñhöch mijts tøø nyajwiingapxø'øy nebiátyhöchä Dios tøø xñajtscapxøøyyä. Jaanch tehñ choobaatp hädaa Diosmädia'agy jaduhñ. Tøø Jesucristo hajxy xñähho'túutäm; jaduhñä nbojpä ngädieeyhåjtäm hajxy tøø xyajnähwåatsäm. Jaduhñ jimñ myiññ cujaay maa Diosmädia'aguiän. ⁴ Coo Jesucristo hånajty tøø yho'ogy, mänit hoy ñaaxtägø'øy. Mänit hoy jiuypiojtägach cumaaxc. Jaduhñ jimñ myiñgombä cujaay maa Diosmädia'aguiän. ⁵ Mänitä Pedro ja'a Jesucristo hoy wyiinguhixø'øy. Mänitä Jesucristo hoy wyiinguhixøøyyägumbä ja'a jiamiøødhajxy, ja'a nämajmetspäjäya'ayhajxy. ⁶ Mänit hoy wyiinguhixøøyyägombä ja'a miägu'ughajpähajxy nämägooxmägo'xnaxiä. Näje'eyyä hajxy tøø yho'nä, caj ñämayyä. ⁷ Mänitä Jacobo ja'a Jesucristo jadähooc wyiinguhixøøguiombä. Mänitä Jesucristo hoy wyiinguhixøøyyägombä ja'a jiamiøødhajxy nägøxiä.

8 Høøch, hōxháamhōchä Jesucristo njaac tehñ yhi_jxy. Pero cábøch mähdiøjc jaduhñ nnä'ägädä tsoobaady. 9 Cábøch cuhdujt møc nmøødä nej yø'ø Dioscugue_xypä cuhdujt hajxy møc jiaanç tehñ miøødän. Cábøch mähdiøjc nhawiinmatsä cooçh mähdiøjc jaduhñ nniñänømøøjät cooçh Dios xquiugue_xyhajpä. Hix, haxøøghøch hijty njäya'ayhaty. Nyajtsaaçhpø_jpiøchä jäya'ayhajxy hijty, ja'a Diosmädia'agy hajxy hijty panøcxpä. 10 Pero cooçhä Dios xjiaanç cugue_xyhaty, páadyhøch jaduhñ xpiuhbety. Høyhøch nduñ. Maas máyhøchä Diosmädia'agy tøø nyajwa'xy ja'a nmädia'agyháamhøch que ja'a Dios quiugue_xypähajxy tøø yajwa'xy, ja'a hajxy jaac jim_bä. Ca'a yhøøch jaduhñ tøø nnä'ä piy ngopcóotyhøch; Dióshøchä wiinmahñdy tøø xmio'oy. Jadúhñhøchä Dios xpiuhbety ja'a miäjaahaam. 11 Pero cab jaduhñ ñejpiä pøn_jaty mijtsä Diosmädia'agy tøø xyajwiingapxø'øy, pø høøch, pø wiinghäna'c. Tu'ugmädia'agy højtsä Diosmädia'agy nyajwa'xy. Y tøø mijtsä Diosmädia'agy mmäbøcy.

12 Jaduhñ højtsä mädia'agy nyajwa'xy coo Jesucristo jiu_jypioj_tägajch coo hänä_jty tøø yho'ogy. Mayyä jäya'ayhajxy jaduhñ quia'a mäbøcy cooc tyijy ja'a ho'oguiäya'ayhajxy quia'a jujypio_ga'añ. Cabä tøyhajt hajxy jaduhñ ñä'ä møødä. 13 Pø cab häxøpy jaduhñ tiøyyä coo ho'oguiäya'ayhajxy jiu_jypio_ga'añ, cabä Jesucristo cu jiu_jypio_jcy. 14 Y coo Jesucristo häxøpy tøø quia'a jujypio_cy, cajxä hädaa mädia'agy häxøpy choobaady neby højts jaduhñ nja yajwa'xy. Y nej mijtsä mädia'agy hajxy mja

mäbøcy, ni je'e häxøpy quia'a tsoobaady. ¹⁵ Jaduhñ hõjtsä Diosmädia'agy nyajwa'xy coo Dios ja'a Jesucristo yagjujypiøjcy. Pø cab häxøpy jaduhñ tiøyyä, hõhndaacp hõjts häxøpy ja'a Dioscøxpä. Hix, pø cab häxøpy jaduhñ tiøyyä coo ho'oguiäya'ayhajxy jiujypiøga'añ, cabä Dios ja'a Jesucristo cu yagjujypiøjcy. ¹⁶ Pø cab häxøpy jaduhñ tiøyyä coo ho'oguiäya'ayhajxy jiujypiøga'añ, cabä Jesucristo cu jiujypiøjcy. ¹⁷ Y coo Jesucristo cu quia'a jujypiøjcy, cabä mädia'agy häxøpy choobaady neby hajxy nmäbøjcäm. Y cabä nbojpa ngädieeyhajxy häxøpy ñähwáatsäm. ¹⁸ Y tøø ho'oguiäya'ayhajxy häxøpy yhäda'agy mõjcu'uhaam, hoy hajxy cu jia mäbøc ja'a Jesucristo miädia'agy. ¹⁹ Coo Jesucristo cu quia'a jujypiøjcy, cab hajxy häxøpy jim nnøcxäänäm tsajpootyp. Tøø hajxy häxøpy nniwyiinhõhñäm hamiñ haxøpy. Hoñaxuu'tsnä jäya'ay hajxy häxøpy xyhíjxäm.

²⁰ Pero tøyhajt jaduhñ coo Jesucristo jiujypiøjtägajch. Jayøjp je'e jiujypiøjtsohñ. Hõxhaam hajxy njaac jujypiøgäänäm. ²¹ Tu'jäya'ay jecy yho'tsohñ hädaa yaabä naaxwiin, ja'a craa Adánhájtäbä. Paadiä Adán jecy yho'cy, coo Dios ja'a miädia'agy quia'a cudiuunä. Y jaanä jaduhñduhmbä, tu'jäya'ay jiujypiøjtsohñ; ja'a Jesucristo je'e. ²² Ja'a Adán, hõjts nhaphajt ndeedyhájtäm je'e, paady hajxy nägøxiä nbaho'ogäänäm. Y jaanä jaduhñduhmbä, nägøxiä hajxy njujypiøgäänämbä, pønjetiä Jesucristo miädia'agy mäbøjcäp. ²³ Coo Jesucristo hänajty tøø jiujypiøjtägach, mänit jim ñøcxcombä maa Tieediän. Coo jim quioo'ty, mänit tiägøøyy

hanehm̄bä. Y coo yaa quiädaactägätsät hädaa yaabä naaxwiin, mänitā ho'oguiäya'ayhajxy jiuypiojtägatsa'añ, ja'a Jesucristo miädia'agy hajxy hänajty tøø miäbøjcäbä. ²⁴⁻²⁶ Mänitā Jesucristo miäjäda'aga'añ. Mänitā Dios ja'a miädsip ja'a quiuhdujthajxy piögáañäxä nägøxiä. Mänitā jäya'ayhajxy quia'a ho'ogaannä ni mänaa. Mänitā Jesucristo ja'a Dios cuhdujt yajcø'ødägø'øwa'añ neby jäda'ahaty yhane'emiän. Mänitā naaxwiimbä wyiimbidaañnä: ²⁷ “Tøø Dios ja'a Jesucristo cuhdujt mio'oy coo jäya'ay cøxiä yhané'emät.” Nømä Diosmiädia'agy jecy miänaañ. Mänit jaduhñ tiøjiajty mänaa Jesucristo tiägø'øyän jäya'ayhanehm̄bä. Pero cabä Diosmiädia'agy jecy miänaañ coo Dios yaghane'emy. Hix, jaaya'ayä cuhdujt yejc coo Jesucristo jäya'ay cøxiä yhané'emät. ²⁸ Coø Jesucristo ja'a miädsip hänajty tøø quia'a cøxy yajmäjäda'agy, mänitā Tieedy cuhdujt quiøxy yajcø'ødägø'øwa'añ mäduhñtiä cuhdujt hänajty tøø mio'oyii. Jaduhñä Jesucristo yhane'ema'añii ja'a Tiédiäm. Jaduhñä Dios cøxiä yhane'ema'añ.

²⁹ Näje'e jäya'ayhajxy ñäbety ho'oguiäya'aguiøxpä. Pø cab häxøpy jaduhñ tiøyyä coo ho'oguiäya'ayhajxy jiuypiojga'añ, tiiguiøxpä jäya'ayhajxy jaduhñ coo ñäbety ho'oguiäya'aguiøxpä.

³⁰ Nmäbøjpy højts jaduhñ coo hajxy njuypiogáañäm, paady højts nga'a mõjpäda'agy, hoy højts nja wädity mäjähñdium homiänaajä. ³¹ Cooch nmäna'añ cooch jaduhñ nwädity mäjähñdium, je'eçh jaduhñ nnänøømby coochä

ca'awiindøyhäna'c-hajxy xjia wi'i yagho'oga'añ homiänaajä. Hermanodøjc, tehñ tiøyhajt jaduhñ cooçh nxoonda'agy mijtscøxpä, je'eguiøxpä coo Jesucristo miädia'agy hajxy mmäbøjcä, ja'a hajxy nWiindsønähajtämbä. Hoorä, jaanä tøyhajt je'eduhmbä cooçh nwädity mäjahñdiuum homiänaajä. ³² Tøøchä ca'awiindøyhäna'c-hajxy mayhooc xjia wi'i yagho'oga'añ yaa Efeso ja'a Diosmädia'agyquiøxpä. Cooçh häxøpy nga'a mäbøcy coo ho'oguiäya'ayhajxy jiuypioğa'añ, cábøchä Diosmädia'agy häxøpy nyajwa'xy. Coo häxøpy jaduhñ quia'a tøyyä coo ho'oguiäya'ayhajxy jiuypioğa'añ, cu nmänáañäm hajxy jaduhñ: “Tsøg hajxy jaac cáayyäm, tsøg hajxy jaac húucäm, coo hajxy jaboom nho'ogáañäm.”

³³ Cab hajxy myajwiinhøønät. Cab hajxy mmøødwädiymúgät ja'a häna'c-hajxy mänaambä cooc tyijy ho'oguiäya'ayhajxy quia'a juypioğa'añ coo hajxy jaduhñ xyajtu'udägóyyät. ³⁴ Najtshixø'øw yø'ø mhaxøøgcuhdujt hajxy. Hoy hajxy myohy, hoy hajxy mnájxnät. Näje'e yø'ø mjamiøødhajxy quia'a mäbøcyñä ja'a Diosmädia'agy. Hoçhähdiuunnä je'eduhñ.

³⁵ Näje'e jäya'ayhajxy yajtøwa'añ: “Nebiä ho'oguiäya'ayhajxy jiuypioğa'añ. Tii ni'x tii copc hajxy miøødhadaamby.” ³⁶ Hoy piønä jaduhñ ñajuø'oy. Coo mädyii tøømd mní'ibät, hoy trigo, tsipcøxp jaduhñ piu'udy; pø caj, cab jaduhñ ñä'ä muxy. ³⁷ Y ja'a tøømd jaduhmbä, coo mní'ibät, wiing jaduhñ jiajnä coo miuxy. ³⁸ Dios jaduhñ tøø wyiinmay nebiatiä tøømd jiädät. Wiingatiä tøømd quiunuu'xy. ³⁹ Jaanä wiingatiä Dios ja'a nni'x

ja'a ngopc-hajxy xquiunúu'xämbä. Y wiingatiä animal ñi'x quiopc-hajxy quiunúu'xäxäbä, mөөдä animalhajxy ja'a tө'өdstuum tsänaabiä, mөөдä muuxyhajxy, mөөдä hacxhajxy. ⁴⁰ Ja'a hajxy jim hijpä tsajtcөxp, wiing hajxy jaduhñ quiähxө'өgy. Cab hajxy jaduhñ quiähxө'өgy neby hajxy yaa quiähxө'өguiän, ja'a hajxy yaa hijpä hädaa yaabä naaxwiin. ⁴¹ Haagä hajajp ja'a xөө mөөдä po'o mөөдä madsa'a, pero haagä wiingaty yhajajy. Jaanä jaduhñ ja'a madsa'abä, haagä wiingaty yhajajpä. ⁴²⁻⁴⁴ Jaduhñ mäwínäts hөjtshájtäm, coo hajxy nho'c coo hajxy ndägóoyäm, cabä mäjaa hajxy nmөөdhájtänä. Mänit hajxy nөcxy nnaaxtägöөyyänä. Ja'a naaxni'x ja'a naaxcopc jaduhñ naaxtägöөby. Mänit hajxy ngөxy yajxee'xtúutänä jutjooty. Mänit hajxy njájtänä hoxiөөghajnä. Pero coo Jesucristo yaa quiädaactägatsáanğombä hädaa yaabä naaxwiin, mänit hajxy njujypiөjtägatsáanğombä, coo hajxy hänäjty tөө nho'c coo hajxy hänäjty tөө ndägóoyäm. Wiing hajxy jaduhñ njadáanänä coo hajxy jim nnөcxáanänä Dioswiinduum. Hoy yajxon hajxy hänäjty njadáanäm haagä mäjaamөөд. Y cab hajxy hänäjty mänaa nho'tägatsáanänä. Wiing hajxy yaa nhíjtäm hädaa yaabä naaxwiin; wiing hajxy hänäjty jim nhidáanänä Dioswiinduum.

⁴⁵ Jaduhñä Diosmädia'agy miäna'añ: “Coo Adán jaduhñ quiunuu'xtsohnä, mänitä jugyhajt miooyä.” Pero coo Jesucristo jiuypipiөjtägajch, paadiä tөyhajt hajxy nmөөdhájtäm coo hajxy nbajujypiөjtägatsáanämbä. ⁴⁶ Jawyiin hajxy yaa nhíjtäm hädaa yaabä naaxwiin. Coo

hajxy njujypiøjtägatsáanäm, mänit hajxy jim nnøcxáanäm Dioswiinduum. ⁴⁷⁻⁴⁹ Ja'a craa Adánhájtäbä, jecy je'eduhñ quiunuu'xtsohnä naaxoc-haam. Yaa jaduhñ jecy chánaabiä hädaa yaabä naaxwiin. Jaanä jaduhñ højtshájtämbä, naaxoc hajxy nni'xhájtäm ngopc-hájtäm nebiä Adángän. Hix, je'e højts nhaphajt ndeedyhájtäm. Haa ja'a Jesucristo, jim je'eduhñ choññ tsajpootyp. Coó yaa quiädaactägatsa'añ hädaa yaabä naaxwiin, mänit hajxy njujypiøgáanäm, pønjataiä miädia'agy hánajty tøø miäbøjcä. Jaduhñ hajxy jim nhidáanäm tsajpootyp nebiä Jesucristo jim yhitiän.

⁵⁰ Hermanodøjc, huuc mäadow hajxy, cab hajxy jim hoy nnøcxämät Dioswiinduum ni'xcopcmøød nebiä nni'xä ngopc hajxy yaa nmøødhájtäm hädaa yaabä naaxwiin, je'eguiøxpä coo hajxy nho'og coo hajxy ndägoyyáanäm. Coó hajxy ndägájtsämät nebiä Jesucristo yhitiän, mänit mäbøcy hajxy jim nnøcxämät tsajpootyp. ⁵¹ Huuc mäadow hajxy nébiøchä Dios jaduhñ xñajtsapxøøyyä. Coó Jesucristo quiädaactägatsa'añ, cahnä hajxy hánajty nägøxiä nho'c ndägóoyyäm. Näje'e hajxy hánajty njúquiämnä. Pero nägøxiä hajxy ndägatsáanäm, møødá jujcypia møødá ho'ogypia. ⁵² Nägooyyä Diosmoonsä ja'a corneta hánajty høxhaam jiaac yajxuuxmaya'añ, ja'a tsajpootypä, mänitä ho'oguiäya'ayhajxy jiujypiøjtägatsa'añ. Cab hajxy hánajty mänaa yho'tägatsaanä. Mänitiä hajxy nägøxiä ndägatsáanäm, møød hajxy hánajty yaabä jujcypia, møød hajxy hánajty tøø yho'oguiäbä. ⁵³ Hädaa naaxni'x

hajxy nmøødhájtämbä, nä'ägädä ho'og nä'ägädä tägoyyáanäm hajxy jaduhñ. Tsipcøxp hädaa nni'x hädaa ngopc-hajxy tiägatsáanäm, mänit hajxy jim nnøcxáanäm Dioswiinduum. Y cab hajxy hánajty nho'tägatsáanänä ni mänaa. ⁵⁴ Y coo hajxy jaduhñ njadáanäm, mänitä Diosmädia'agy tiøjiada'añ coo jaduhñ miäna'añ: “Cabä jäya'ayhajxy hánajty mänaa yho'og tiägoyyaañnä.” Coo Jesucristo hajxy tøø xñähho'túutäm, paady hajxy jiiby nga'a häda'agáanäm møjcu'uhaam. ⁵⁵ Y coo hajxy jiiby nga'a häda'agáanäm, paady hajxy nga'a tsähgøøyyänä coo hajxy hánajty nho'ogáanäm. ⁵⁶ Hoorä, coo Diosmädia'agy hajxy hoy nga'a cudiúunäm, paady hajxy ngädiéhyyäm, paady hajxy nhó'cäm. ⁵⁷ Tsøgä Dios hajxy nämáayyäm “Dioscujú'uyäp”, je'eguiøxpä coo Jesucristo hajxy xñähho'túutäm, ja'a hajxy nWiindsønhájtämbä. Coo hajxy xñähho'túutäm, paady hajxy jiiby nga'a häda'agáanäm møjcu'uhaam.

⁵⁸ Jaduhñds je'e, hermanodøjc, tsøg hajxy hoy túunäm hamuumdu'joot ja'a Dioscøxpä. Cabä miädia'agy hajxy mänaa nnajtshixøøyyämät, howyiaambatiä jäya'ay hajxy cu xjia nämáayyäm. Nnajuøøyyäm hajxy jaduhñ coo Dios hajxy xpiuhbedáanäm.

16

¹ Mguexaambiä xädø'øñ hajxy jim Judeanaaxooty maa hermanodøjc-hajxiän. Jaduhñ hajxy myajmújpät nébiøchä hermanodøjc-hajxy nhanehmy jim Galacianaaxooty. ² Näxøøbaadiä xädø'øñ hajxy mbuhgónät mäduhñtiä hajxy hánajty tøø mguduñ. Hawiing hajxy jaduhñ

myaghídät. Mänítøch hajxy xmió'owät cooçh jim̄ nmédsät maa mijtsän neby hajxy jaduhñ mänit møc hadø'øçhä mga'a wädijtä'agät. ³ Mänitä hermano hajxy mwiimbíwät pønjátyhøçhä xädø'øñ hänäjty nyajmäguexaamby jim̄ Jerusalén maa hermanodøjc-hajxiän. Nocymiøød hajxy ñøcxät nebiä hermanohajxy jim̄ ñajuó'øwät cooçh hänäjty tøø nguexy. ⁴ Pø hahixøøby hänäjty cooçh jim̄ nnøcxät, mänítøch hajxy xpianøcxät.

⁵ Cooçh hänäjty jim̄ nnøcxa'añ Corintos, tu'unaxáambøch jim̄ Macedonia. ⁶⁻⁷ Coo Dios jaduhñ miäná'anät, jégäbøch jim̄ maa mijtsän. Wéhndøch jim̄ nga'a tsoj wiimbídät høxtä coo tøøchpoj hänäjty tøø ñaxy. Jadúhñhøch mijts jejcy nguhíxät. Jadúhñhøch hajxy xpiuhbédät majátyhøch hänäjty njaac wädita'añ. ⁸ Pero cábøch yaa ndsoj tu'ubøga'añ yaa Efeso. Coo Pentecostésxøø hänäjty tøø yhabaady, mänítøch ndu'ubøga'añ. ⁹ Hix, jaanç tehñ miäbøgaambä jäya'ayhajxy yaa, hóyhøch nmädsiphajxy jia nämayyá.

¹⁰ Coo Timoteo jim̄ miédsät maa mijtsän, hoy yaxón hajxy myajmédsät. Hix, jaduhñä Diostuung tiuumbä nébiøch nduñän. ¹¹ Cab hajxy jaduhñ mbéxät. Mbuhbédäp hajxy jaduhñ nebiaduhñ jootcujc jiaac mínät yaa maach høøçhän. Nja wi'i jibhijxyp højts yaa møødä hermanodøjc-hajxy.

¹² Y ja'a hermano Apolos, nja mänuu'xtáac-høch je'e coo hermanodøjc cu miøødnøcxy maa mi-jtsän, pero cab jäda'a tiehñ ñøcxa'añ. Cooc ñäbaadø'øwáañäxä, mäniñäc hänäjty ñøcxa'añ.

¹³ Mniyajcopcø'øwøøjäp hajxy. Hoyyá

Diosmädia'agy hajxy myajtu'uyó'oyät. Cab hajxy pøn mdsähgø'øwät. Mmee'xtúgäp hajxy. ¹⁴ Mničhoc mnimiee'xóøjöp hajxy hamuumdu'joot.

¹⁵ Hermanodøjc, mnajuøøby hajxy coo Estéfanas ja'a Diosmädia'agy hajxy jayøjp miäbøjtsohñ jim Acayanaaxooty, møødä yhuung møødä tio'oxy. Jimä hermanodøjc hajxy piuhbety. ¹⁶ Jadúhñhøčhä njoot chocy coo hajxy mbahix mbadúnät nebiä Estéfanashajxy tiuñän. ¹⁷ Xoondáacpøch jaduhñ coo Estéfanashajxy tøø miech møødä Fortunato møødä Acaico. Nnäjootmayhájpøch mijts coo hajxy mjäguemä. Pero coo Estéfanashajxy tøø miech, paady cábøch njootmayhajnä. ¹⁸ Tøøčhä njoot hajxy xyajmøcpøjcä. Jadúhñhøčhä mjoothajxy nyajmøcpøgáanäbä. Mnajuó'øwäp hajxy jaduhñ coo Estéfanashajxy hoy tiuñ.

¹⁹ Mijtsä hermanodøjc-hajxy xyajpoo'xp ja'a hajxy jim tsänaabiä Asianaaxooty. Xyajpoo'xp mijtsä Aquilahajxypä ja'a Dioscøxpä, møødä Priscila, møødä hermanodøjc-hajxy jim hamugøøbiä Dioswiingudsähgøøbiä maa tiøjc-hajxiän. ²⁰ Xyajpoo'xp mijtsä hermanodøjc-hajxy nägøxiä. Hoy yajxon hajxy mniyajpoo'xóøjät.

²¹ Nhamdsoo cø'øháamhøch hädaa nocy njah-miay, høøch Pablo.

²² Pønä Jesucristo ca'a tsojp, ja'a hajxy nWi-indsøn hájtämbä, ween haxøøgtuum ñøcxy. Wi-indsøn, min hadø'øčhä.

²³ Weenä Jesucristo hajxy xmio'oy ja'a hoy-hajt ja'a weenhajt, ja'a hajxy nWiindsøn hájtämbä.

24 Ndsójpíoch mijts nägøxiä ja'a Jesucristocøxpä.
Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

4e564219-157f-5807-b810-47a15308b8b8